

畿輔通志

CHINESE-JAPANESE COLLECTION
HARVARD COLLEGE LIBRARY
FROM HARVARD-YENCHING INSTITUTE

JUN 28 1932

ChL3129/82

畿輔通志卷之

詔諭

聖祖仁皇帝

康熙四十一年六月初一日

諭禮部這訓飭士子文若令各府州縣學宮一體勒石
恐有不齊石州縣地方或致借端擾派著俟國子監
勒石後以榻本彙頒各省轉發所屬各學

康熙四十二年二月初五日

諭永定河分司朕觀黃河險要地方應下挑水埽壩現
今永定河朕親指示挑水等工俱有裨益爾遵照朕

哈佛大學
圖書館
珍藏印

指示式樣前往烟墩九里岡龍窩三處築挑水壩數座試看有無裨益雖被衝壞無妨完工之日令該地方官盡心防守如有蟄陷不時修葺可將此旨傳與總河張鵬翮速派賢員令其多備物料夫匠於朕回鑾之前完工需用錢糧與爾無涉不可經手工完將用過錢糧記明具奏如遇桃汛水發卽行停止

康熙四十二年五月十九日

諭禮部國子監文廟現勅廣善庫官員動帑修理順天府學尊經閣等處亦著一併督修用弘文教

康熙四十三年十月初七日

諭戶部今歲直隸地方雨暘應候禾稼有秋各郡民生皆獲安恆業惟是去歲山東被災之民自冬月以迄春夏流離轉徙入順天河間境內者甚多於時設廠煮糜所在賑救因而米價至今未減誠恐近畿一路閭井小民絀於生計是宜加恩寬恤用弘休養順天河間二府屬康熙四十四年應徵地丁銀米著通行蠲免該巡撫卽飭府州縣官張示徧諭務俾窮鄉僻壤均霑實惠以副朝廷優軫畿輔黎氓至意爾部卽遵諭行特諭

康熙四十四年十一月十七日

諭戶部朕宵旰勤民厯恩愛養惟務簡徵寬賦以期實惠黎元間有州縣水旱不登卽詔所司亟議蠲賑其直隸各省每歲應輸額賦有以次遞蠲者有頻蠲數年者有將帶徵積欠暫令停徵者凡以蠲除額賦專爲小民樂業遂生一歲以內足不踐長吏之庭耳不聞追呼之擾庶幾休養日久馴致家給戶足而民咸得所也曩年楚省錢糧雖屢行豁免今已歷數載未經特蠲應將該省額賦全免一年以示朕加恩優渥之至意湖北湖南康熙四十五年除漕糧漕項外其餘地丁銀米一槩免徵舊欠未完者並停輸納爾部

移文該督撫令各飭屬員張示徧諭窮鄉僻壤咸使周知儻不肖官吏於額徵之外巧立名色別有科派私圖肥己者察出定治重罪爾部卽遵諭行特諭

康熙四十五年五月十七日

諭戶部朕宵旰圖維勤求民隱每欲敷蠲貸之恩以爲閭閻留有餘之力直隸山東地方四十二年偶遇災沴因特免山東四十三四兩年額賦並四十一年以前積欠錢糧直隸則順天河間兩府四十四年額賦亦俱豁免今雖屢年收穫民氣漸舒而所有宿逋尙應輸納朕念黎元方有起色辦賦猶艱一時新舊並

徵勢難兼應宜更加寬恤以宏休養直隸自康熙四十一年至四十三年各府屬未完民欠銀八萬二千七百兩有奇糧五千九百石有奇山東省康熙四十二年各府屬未完民欠銀一百六十九萬一千七百兩有奇糧五千九百石有奇或見在徵取或分年帶徵俱著通行蠲免俾小民悉除逋負之累儻應徵舊欠有見完納在官者卽准抵本年正賦諭旨到日各該撫速行所屬有司徧示曉諭有不肖官吏朦溷徵收不與開除明白者該撫卽時叅劾嚴加治罪爾部卽遵諭行特諭

康熙四十五年十月二十五日

諭戶部朕子育黎元日求所以休養利濟之道念惟賜

租減賦實有裨益於民生直隸各省錢糧次第全蠲

一年者業經數舉獨是歷歲逋負積累加增舊稅新

徵勢難兼辦縱使少寬民力分年帶輸而督令續完

仍多拮据朕睠懷及此深切軫恤是用蠲逋已責大

沛恩膏俾閭閻獲免追呼官吏亦不罹叅罰直隸山

東積欠錢糧今年俱已蠲免其山西陝西甘肅江蘇

安徽浙江江西湖北湖南福建廣東各省自康熙四

十三年以前未完地丁銀二百一十二萬二千七百

兩有奇糧十萬五千七百石有奇著按數通行豁免
或舊欠已完在官而見年錢糧未完足者亦准扣抵
諭旨到日各該撫立行所屬張示徧諭有不肖有司
以完作欠朦濶銷算及開除不清者該督撫卽時題
叅嚴加治罪爾部卽遵諭行特諭

康熙四十六年六月二十八日

諭起居注今年朕於二月二十八日抵揚州彼時麥已
秀矣至四月二十日回鑾則正在刈麥之時南方麥
秀雖早於北方而仍與北方同熟至於穀價果品大
畧皆然江南梅花正月卽放至五月始實朕取至暢

春園種之見其三月花放亦於五月結實花放於兩
月之前而同至五月結實此皆水土之故也南方之
物開花吐穠雖早而成實遲故食之則難消北方之
物開花吐穠雖遲而成實速故食之則易消皆土性
冷煖自然不可強者試於塞外種稻其地高寒難以
收穫種別項之穀則無如塞外豐茂者江南不及京
都京都不及塞外朕以此等土性向張玉書李光地
言之彼皆心服謂朕所見極是朕巡行各省所見諸
物無不留心詳察故知之甚明確也

康熙四十七年七月二十五日

論內閣從前巡捕三營屬督捕管轄時營官侵蝕兵糧雖兵數具存而京城大臣官員家丁皆充兵冒餉全無實濟積弊沿流極其懈弛以致漢官所居地方盜賊疊告外城官民不能聊生因而漢官具疏陳奏朕下九卿等會議歸併前任步軍統領等令其清釐營伍選擇營弁盡力搜稽嚴緝攘劫然後盜賊漸減官民獲安此衆所共知著有明效者也竝非至陶和氣任內方令統轄陶和氣一人之用舍有何關繫但其人一經叅劾則該部自據定例具議絕不在於扶同附和相繼續叅此風亦斷不可長且巡捕三營官員

或於各省營弁或於旗下武職皆經朕親選壯健人才補用若果有一二驕悍不法之人言官卽當指名題叅乃將百餘員之營弁三千餘名之兵丁一槩溷指以爲驕悍不法可乎著仍指名具奏况武職兵丁兵部皆可稽察步軍統領巡捕三營亦隸於兵部誠欲建言則將兵部題叅未爲不可高遐昌乃謂巡捕三營應歸併兵部所言大謬又街道事務司坊等官管理時畏懼顯要職官朘削里巷小民止知勒索鋪戶銀錢而街道事務毫不置念因敝壞已極故亦歸併步軍統領管理今旣稱商民受街道之累卽著高

遐昌兼管一年務令商民不致苦累街道大加肅清若果能綽然辦理誠為能言即能行之人矣下所司知之

康熙四十八年十月初二日

諭都察院通州兩岸堤工每年派官修理一年一換前旨甚明本內未將本年所派司官明白指出含糊推諉具議殊屬不合著都察院嚴議奏

康熙四十九年三月十二日

諭吏部原任大學士李蔚贊理機務二十餘年始終恪慎懋著勤勞朕懷時切追念其孫主事李敏啟著越

常格陞補提督四譯館太常寺少卿以示崇獎舊臣優錄後嗣至意

康熙四十九年十月初三日

諭戶部朕恭膺

天眷祇承

列祖鴻庥統御萬方子育兆庶厘懷至治宵旰靡寧幸際海宇同風邊隅嚮化遐邇中外帖然衽席之安者是皆仰荷

天地

祖宗福佑之所致也方朕八齡踐祚之初

太皇太后問朕何欲朕對臣無他欲惟願天下治安生民樂業共享太平之福而已迄今五十年矣惓惓此心未嘗一日少釋每思民爲邦本勤恤爲先政在養民蠲租爲急數十年以來除水旱災傷例應豁免外其直省錢糧次第通蠲一年者屢經舉行更有一年蠲及數省一省連蠲數年者前後蠲除之數據戶部奏稱通共會計已逾萬萬朕一無所顧惜百姓足君孰與不足朝廷恩澤不施及於百姓將安施乎朕每歲供御所需槩從儉約各項奏銷浮冒亦漸次清釐外無師旅饑饉之煩內無工役興作之費因以歷年節

捐之儲蓄爲頻歲渙解之恩膏朕之蠲免屢行而無國計不足之慮亦恃此經畫之有素也比來省方時邁已歷七省南北人民風俗及日用生計靡不周知而民生所以未盡殷阜者良由承平旣久戶口日蕃地不加增產不加益食用不給理有必然朕洞矚此隱時深軫念爰不靳敷仁用甦民力明年爲康熙五十年思再沛大恩以及吾民原欲將天下錢糧一槩蠲免因衆大臣集議恐各處需用兵餉撥解之際兵民驛遞益致煩苦細加籌畫悉以奏聞故自明年始於三年以內通免一週俾遠近均霑德澤直隸奉天

浙江福建廣東廣西四川雲南貴州各巡撫及府尹所屬除漕項錢糧外康熙五十年應徵地畝銀共七百二十二萬六千一百兩有奇應徵人丁銀共一百一十五萬一千兩有奇俱著察明全免竝歷年舊欠共一百一十八萬五千四百兩有奇亦俱著免徵其五十一年五十二年應蠲省分至期候旨行民間舊欠既經豁免嗣後每年額徵錢糧務如數全完儻完不及額或別有虧空託稱民欠則負國甚矣卽責令督撫以下官員償補仍從重治罪夫地方大吏以及監司守令皆與吾民誼均休戚者也誠克體朕孳孳保赤之懷實心愛養力杜侵牟朘削則閭閻咸得衣食滋殖無有失所而爲官吏者亦身名俱泰豈非昇平樂利之盛事歟爾部移文各督撫諭旨到日卽刊刻頒布徧示窮簷令咸知悉特諭

康熙五十年十月初三日

諭

戶部朕誕膺大統撫育寰區夙夜孜孜不自暇逸凡以爲民也勤圖利濟休養安全卽無水旱之虞時布寬仁之政蠲租除賦務使遐方率土無不均沾或值雨暘偶愆出帑發粟多方賑卹其有益於吾民者靡弗備舉而亟行之朕殷懇周詳之至意前四十九年

所頒諭旨申晰甚明原欲將五十年天下錢糧通行蠲免以諸臣集議恐需用兵餉撥解之際兵民驛遞益致煩苦故自五十年爲始三年之內全免一週除將直隸奉天等九直省康熙五十年地丁錢糧一概蠲免及歷年舊欠錢糧一併免徵外山西河南陝西甘肅湖北湖南各撫屬除漕項外五十一年應徵地畝銀共八百四十萬四千兩有奇人丁銀共一百二十萬八千一百兩有奇著察明全免并歷年舊欠共五十四萬一千三百兩有奇亦俱著免徵其五十二年應蠲省分至期候旨行民間舊欠既經豁免嗣後

每年額徵錢糧務如數全完儻完不及額或有虧空託稱民欠卽責令督撫以下官員償補仍從重治罪該督撫須實心力行期副朕惓惓愛民之意如有指稱事故侵欺科派事發之日必嚴行究治諭旨到日徧示城郭鄉村深山窮谷咸使知悉爾部卽遵諭行特諭

康熙五十一年十月十九日

諭直隸巡撫趙宏燮直省督撫每奏報年穀收成朕必批令豫籌積貯以備小有災荒卽行賑濟諭旨甚明并陘小縣邨落無幾偶遇小災便聞人民不得安堵

如果能遵前旨於豐年豫爲貯積人民何至艱食不安其居此皆因地方官奉行不實全無儲蓄所致嗣後地方官須遵朕前旨實心奉行務期有濟民生特諭

康熙五十四年二月十三日

諭直隸巡撫趙宏燮朕嘗讀無逸篇留心稼穡久矣去歲臘前瑞雪盈尺時屆陽節細雨連綿輿情怡悅早得布種矣所慮者起發太盛則收穫之際恐有二疸之虞爾等徧示民間時值耘耕卽令苗稀疏預防風霾朕以民生爲念勸農爲本已有所知不得不示特

諭

康熙五十四年二月二十三日

諭直隸巡撫趙宏燮朕每年春間行幸水淀近見民生雖不能家給人足比之往時似覺差勝但村莊之中誦讀尙少朕思移風易俗莫過讀書非此無可上進况畿輔之地乃王化所先宜於窮鄉僻野皆立義學延師教讀以勉勵孝弟可望成人矣爾卽徧示莊村皆知朕崇文好學之深意特諭

康熙五十四年十月三十日

諭戶部朕早夜孜孜軫懷民瘼四方水旱時勤諮詢惟

恐閭閻之蓋藏未裕一遇儉歲收穫失望窮黎卽無以資生也直隸順天保定河間永平宣化五府所屬地方今歲雨水過溢田畝被淹者甚多穀耗不登民艱粒食現今緩徵賑借雖惠澤頻施而來春應辦錢糧若仍行徵取則民力匱乏輸將難繼著將五府州縣康熙五十五年地丁銀八十五萬五千八百兩零糧米豆穀一十一萬五千五百石零草九萬四千九百束零俱通行蠲免爾部行文該督遍飭所屬實心奉行俾窮鄉僻壤均沾朝廷德意倘有不肖官吏私徵侵蝕者察出定行從重治罪爾部卽遵諭行特諭

康熙五十五年閏三月二十二日

諭戶部朕惟民爲邦本必年穀順成家給人足乃愜朕

撫育元元之意自御極五十餘年宵旰孜孜無論遐方近地編民疾苦必備悉諮詢設有水旱蠲賑頻頒務講求實惠霑被羣生蓋不徒事軫恤之虛文也直屬順永保河宣五府去歲雨水過溢穀耗不登因全蠲額賦發米減糶今巡撫趙宏燮以目下正當青黃不接之時順永二府米價騰貴疏請借道庫銀六萬兩委員赴乏米州縣貴買賤賣朕思閭閻蓋藏未裕本地出米無幾以銀易米恐米價反致翔涌現今京

通二倉積米甚多不如將舊米分發二十萬石於各州縣賑濟之食窮黎官無轉售之勞民獲現在之米於地方大有裨益且畿輔地近京師輓運亦易著大學士等會同九卿速行詳議具奏特諭

康熙五十五年十月初八日

諭大學士九卿設立社倉止一年可行若年久便不能行朕甚留意此事李光地爲巡撫時曾試行之因難行至今尙未具奏張伯行謂知府謝賜履稱永平府屬州縣從前俱有社倉今年春間乏食將倉糧借出民甚賴之旣然如此永平府所屬地方民人緣何流

往盛京幸將軍撫恤乃得給與口糧養贍耳今年直督趙弘燮具題常平倉米石及莊頭等糧米俱已用完請借銀買米賑濟朕發通倉米二十萬石遣大臣官員分路賑濟今張伯行及知府謝賜履旣稱設立社倉於民大有裨益著交與張伯行謝賜履二人於永平府屬地方舉行五年如果有益再於各處舉行爾等會同九卿詢問張伯行議奏

康熙五十五年十二月二十六日

諭戶部朕御極以來念切民生時勤宵旰凡巡歷所至必以編氓疾苦備悉諮詢蓋欲比戶之蓋藏恒裕三

時之水旱無虞斯民氣和樂聿成豐亨豫大之休也
頃者朕巡行口外經過三河等州縣暨永平府交界
地方見今歲秋成豐稔米價稱平惟是去年雨水過
溢田畝間被淹沒朕深加軫惜蠲賦平糶轉漕分賑
貧民使不致失所今者雖復有秋然僅足支一歲之
用恐來年之輸將尙多難繼是必再沛恩膏始可大
培民力著將順天永平兩府所屬大興宛平通州三
河密雲薊州遵化順義懷柔昌平寶坻平谷豐潤玉
田良鄉涿州武清永清香河霸州大城文安固安東
安房山保定延慶梁城盧龍遷安樂亭灤州撫寧昌

黎山海等州縣衛所康熙五十六年地丁銀二十六
萬四千三百三十六兩零米豆高糧二萬一千六百
四十六石零草九萬四千九百五十束零俱通行蠲
免所有歷年積欠銀九萬三百九十六兩零米豆高
糧一萬六千二百七十五石零草八萬四千四百七
十束零亦并與豁除爾部行文該督嚴飭所屬實心
奉行俾遐村窮谷均霑德意倘有不肖有司借端朦
混私行征收者察出定行從重治罪爾部卽遵諭行
特諭

康熙五十六年四月十一日

諭大學士九卿倉內米石甚多着分運直隸各府州縣存貯預備於民甚有裨益每府或貯萬石每州縣或貯數千石附近通州河道者交與倉場總督等運送其餘府州縣所運米石速行文直隸總督派地方官乘未雨之先輓運值此青黃不接之時於各府州縣平糶亦大有益於百姓其江南浙江如有應行截留漕糧將截留若干之處爾等一併速議具奏

康熙五十六年十一月二十五日

諭戶部朕撫馭寰宇五十餘年夜寐夙興爲小民勤求生遂凡率土遠近皆期共享樂利聿成家給人足之

休未嘗一日不厯諸懷也數十年以來各省正賦屢經全免歷年積欠亦已蠲徵偶有雨澤愆期或發倉廩散給或截漕糧賑救不惜數萬萬金錢米穀頻沛恩施誠念窮簷之艱慮其至於顛連失所耳近者民力雖已稍紓然念分年帶徵銀兩若不格外優寬則小民一歲所獲分納二年之賦以其贏餘養贍室家斷難充足朕每懷及此軫惻良深宜更加殊恩通行豁免今將直隸安徽江蘇浙江江西湖廣西安甘肅等八處帶徵地丁屯衛銀二百三十九萬八千三百八十兩有奇槩免徵收其漕項雖例不准免亦著破

格施恩將安徽江蘇所屬帶徵漕項銀四十九萬五千一百九十餘兩米麥豆一十四萬六千六百一十餘石內免徵各半爾部卽行文該督撫嚴飭所屬實心奉行徧加曉諭俾民間無徵催之累均霑實惠用稱朕撫卹羣黎至意倘有不肖有司借端朦混私行徵收者該督撫嚴察叅處如該督撫失察一併從重處分爾部卽遵諭行

康熙五十八年五月初六日

諭戶部朕幸熱河一路麥苗盈野收成頗佳但麥熟之歲往往雨水早而且多朕留心稼穡歷年最久所見如此爾部卽速傳直隸河南山左山右口外地方速將已收之麥晾乾入屯收貯以免潮濕壞爛則今年所收足用二年矣

康熙六十年四月二十六日

諭戶部尚書孫渣齊朕覽京城所報米價殊屬騰貴將京通倉米石交與侍郎張伯行比時價減五分糶賣內務府莊頭所交穀石現在州縣收貯亦派滿漢賢能司官照此糶賣正值穀價騰貴之時恐有偷盜倉內米石者著提督等不時緝拿照此速行

康熙六十一年四月初四日

諭戶部趙宏燮奏將收貯真定順德各州縣四萬石米平糶其餘州縣有米貴之處亦將倉糧平糶十分之三俱俟秋收後買補還項等語去年各州縣收貯莊頭等所受米石部內曾遣司官會同地方官糶賣其糶米銀兩至今尚未交完據此各州縣收貯倉糧俱無實在平日積貯原爲備荒而設今值青黃不接之時固應平糶但地方官虧空倉糧不過糶賣數石卽借此掩飾伊等虧空究竟倉糧旣虧百姓從何糶買於民生並無益處也現今存倉米穀數果全有卽照該督所請糶賣倘朕遣大臣查看時州縣並無米穀黎庶不得糶買將州縣官卽行正法該管上司從重治罪

畿輔通志卷之二

畿輔通志卷之三

詔諭

皇上諭旨

康熙六十一年十二月初二日

諭戶部

皇考御極六十餘年澤周兆姓恩洽人心凡

巡幸所經州縣小民無不除道清塵趨事恐後古北口一

路為我

皇考每年行幸之地農工商賈皆得瞻仰

天顏親承膏澤今聞

皇考賓天民心不知如何悲痛此路百姓歷年出力實堪
憐憫今將宛平順義懷柔密雲平谷五縣昌平一州
雍正元年應徵正項錢糧一萬四千三百八十兩零
盡行蠲免又

陵寢一路此時正當修道之際亦宜軫恤今將大興三河
二縣通州薊州遵化州三州雍正元年應徵正項錢
糧一萬三千三百七十六兩零亦盡行蠲免爾部行
文該撫徧飭所屬州縣實心奉行務令小民均霑德
惠倘有不肖有司私行徵收澤不下究事覺定行重
處爾部卽遵諭行

雍正元年正月二十七日署直隸巡撫趙之垣題
請領賣通倉變色米石戶部議覆准行奉

上諭此案係朕親率爾等辦理之事

皇考因直隸各州縣內有米穀短少之處將通倉變色米
石糶賣於民有益並非勒令每處著落糶賣若干不
但水次遙遠之州縣雖近水次之地若於民無益亦
不勒令糶賣今趙之垣不能領會

皇考原降諭旨之意以二百里以內附近水次之州縣派
定數目糶賣具奏如此不但無益且又多此一事戶
部卽照趙之垣所議准行甚謬此案無庸另批著曉

諭趙之垣將此項變色米石於米穀短少之州縣領去糶賣若於民有益卽行領賣若領運繁難無有益處卽行停止如民間有因米穀短少情願赴通糶買此項米石自行運回者亦聽其買去

雍正元年二月十六日

諭戶部治天下要道莫過安民朕繼承大統以來軫念蒼生病瘵時切直隸山東河南連年歉收朕特降諭旨緩徵遣官賑濟每歲京師五城設立粥廠自十月初一日起至三月二十日止交五城御史煮粥賑饑今尚在青黃不接之時著展期一月煮粥散賑至四月二十日止但就食之民來京者多每日各增加銀米一倍務使得霑實惠以副朕憫念窮民至意

雍正元年四月十五日

諭直隸各省督撫國家敦勵風俗首重賢良舉髦士以勸秀民實爲政教之大端凡封疆大吏宜共體此意廣詢博訪不可視爲具文漫不加察也前所頒恩詔內有每府州縣衛各舉孝廉方正暫賜以六品頂帶榮身以備召用一條距今數月未有疏聞豈通都大邑之中海澨山陬之遠遂無潛修砥操克稱俊乂可應詔旨者歟誠恐有司怠於採訪雖有端方之品無

由上達殊負朕殷殷延攬之至意特著直省各督撫速遵前詔確訪所屬果有行誼篤實素爲鄉黨所推者卽列名具奏毋得隱蔽及濫引塞責

雍正元年四月十八日直隸巡撫李維鈞奏修築太行等堤銀兩請公同捐助奉

上諭修築甄家莊等四處漫決堤工用過銀兩俱因緊要工程動用不必捐補著以正項錢糧奏銷

雍正元年六月二十六日兵部議奏未經出口兵丁其倒斃馬匹仍令賠補奉

上諭保定府城守尉所屬滿洲兵丁古北口提標綠旗兵丁雖未出口亦勤勞四載有餘若仍令賠補馬匹朕心不忍著俱從寬免

雍正元年六月三十日

上諭朕去年親閱京通各倉雖有積貯但京師人民聚集食指浩繁米糧關係重大儲備不可不多查有漕各省惟湖廣江西產米最廣近年盛京年歲豐收米價亦賤此三處酌量動正項錢糧採買數十萬石僱募民船運送來京大有裨益著怡親王隆科多會同確查作何採買運送之處詳議具奏

雍正元年七月初七日

諭禮部國家祀典必貴潔誠

先農壇每歲展祀且爲親耕耜田之所最宜清肅舊制圍墻內有地一千七百畝以二百畝給壇戶種植五穀蔬菜以供祭祀餘一千五百畝每年交租銀三百兩以備修理聞康熙四十年間內務府撥給園頭耕種菜蔬無所從出惟向市井採買殊非潔淨精誠之意今著園頭清還地畝仍給太常寺壇戶耕種以供祭祀之需餘地一千五百畝著將內外圍墻查明丈尺每種地十畝估計令其修墻若干務期加謹葺護毋致傾壞每年將滿漢太常寺少卿派出一員不時稽察庶壇壝清潔祀事更加虔謹矣

雍正元年七月十三日

諭倉場侍郎糧運關係國儲必須遄行無阻始得及早

抵通自楊村至通州河道多有淤淺糧船起剝每至耽延以致回空凍阻并誤新漕著該督嚴飭坐糧廳查看河道有淤淺處作速挑濬深通毋使阻滯並知會天津總兵官用心催趕且天津一帶地方向有販賣私鹽等弊糧船不許停泊火速趲行直抵通州至抵通後速行起卸交倉毋得需索抑勒苦累軍丁朕去年親自閱倉知漕糧過壩一晝夜可五萬袋可見

交卸甚易爾等加意督催務使空船早得回南新漕亦可無誤漕運一事朕親身閱歷纖悉洞知爾等倘不盡心料理或因勒索致有遲延責無所諉

雍正元年十月初五日

諭兵部驛站關係重大經朕屢加嚴諭然其間積弊難以盡詰有在官之累有在民之累如直隸山西等省差徭更爲浩繁雖驛馬足數亦供應不敷乃內而兵部外而驛道於給發馬匹時官吏通情受賄往往所給浮於勘合之數且行李輜重皆令驛卒乘馬背負多至八九人不等所到州縣以見馬換馬向有舊例

不敢詰問至督撫提鎮經過之處更唯命是從嗣後照勘合之外有敢多給一夫一馬者許前途州縣卽據實揭報都察院以聽糾叅如甲縣容情不揭而被乙縣揭報者並甲縣一併治罪其督撫提鎮騷擾驛遞者皆照此例庶少甦在官之累至若河南山東諸省離京稍遠謂耳目易欺每驛額設馬匹不過十存三四其草料工食仍照舊開銷且逐年詳報倒斃侵蝕補買之價差使一至則照里科派將民間耕種牲口強遣當差令其自備物料跟隨守候種種累民尤屬不法著該地方督撫將所有驛站逐一徹底清查

缺額者勒限補買至派借民間牲口尤當勒石永禁違者卽從重治罪

雍正元年十月初五日

諭內務府直隸省州縣亦可與爾衙門文移往來如莊頭人等有在州縣地方生事者著該州縣官員竟行呈報爾衙門爾等查問訓飭若不悛改卽行斥革著行文直隸巡撫凡有皇莊州縣地方遍行曉諭至各莊頭交糧時須逐一查問將生事之人嚴加訓飭不肯悛改者卽行斥革

雍正二年二月二十日

諭戶部朕軫念民依時屢宵旰遇有旱澇災荒惟恐窮黎失所雍正元年因直隸山東河南山西二麥歉收特遣廷臣發粟賑濟錢糧照被災地方分數已經蠲免停徵嗣蒙

天庥雨暘時若四省秋成豐稔少慰朕懷但念四省頻歲

荒歉較別省爲甚今百姓元氣方復若將兩年舊欠併於本年徵收民力不支爾部速行文各巡撫查明實在舊欠若干據實題報分作三年帶徵其已收在官者速飭起解毋令不肖有司借端蒙混致滋虧空

雍正二年二月二十日

諭直省督撫朕惟四民以士爲首農次之工商其下也漢有力田孝弟之科而市井子孫不得仕宦重農抑末之意庶爲近古今士子讀書砥行學成用世國家榮之以爵祿而農民勤勞作苦手胼足胝以供租賦養父母育妻子其敦龐淳樸之行豈惟工賈不逮亦非不肖士人之所能及雖寵榮非其所慕而獎賞要當有加其令州縣有司擇老農之勤勞儉樸身無過舉者歲舉一人給以八品頂帶榮身以示鼓勵

雍正二年閏四月初四日

諭直省總督巡撫社倉之設原以備荒歉不時之需用意良厚然往往行之不善致滋煩擾官民俱受其累朕意以爲奉行之道宜緩不宜急宜勸諭百姓聽其自爲之而不當以官法繩之也近聞各省漸行社倉之法貯蓄於豐年取資於儉歲俾民食有賴而荒歉無憂朕心深爲嘉悅但因地利宜須從民便是在有司善爲倡導於前留心稽核於後使地方有社倉之益而無社倉之害此則爾督撫所當加意體察者也又聞民間輸納錢糧自封投櫃亦屬便民之法但偶有短少之處令其添補每至多方需索其數浮於所少之外理應將原銀發還仍於原封內照數補足交

納庶可免多索之弊此雖細事督撫大吏亦不可不
留心體察嚴飭有司以除民累

雍正二年閏四月初十日

諭順天府府尹京師廣寧門外向有普濟堂凡老疾無
依之人每棲息於此司其事者樂善不倦殊爲可嘉
聖祖仁皇帝曾賜額立碑以旌好義爾等均有地方之責
宜時加獎勸以鼓舞之但年力尚壯及游手好閒之
人不得借名混入其中以長浮惰而生事端又聞廣
渠門內有育嬰堂一區凡孩穉之不能養育者收留
於此數十年來成立者頗衆夫養少存孤載於月令

與扶衰恤老同一善舉爲世俗之所難朕心嘉悅特
頒匾額并賜白金爾等其宣示朕懷並倡率資助使
之益加鼓勵再行文各省督撫轉飭有司勸募好善
之人於通都大邑人煙稠集之處若可以照京師例
推而行之其於字弱孤之道似有裨益而凡人怵
惕惻隱之心亦可感發而興起也

雍正二年閏四月十八日

諭漕運總督及直隸山東河南巡撫各省旗丁運糧進
京沿途水次理應奉公守法乃數年前浙江湖廣糧
船因懷挾私忿彼此爭鬪持戈放箭殺傷者多逞其

兇頑肆行無忌又聞前歲之冬糧船守凍在山東地方竟行搶奪擾害居民去歲回空又聞強取百姓衣物此等皆大干法紀嗣後總漕若不嚴加約束禁止妄行仍然寬縱直隸山東河南巡撫卽著轉飭沿河官弁不時稽察倘犯法爲非卽分別輕重按律治罪不得稍有徇縱推諉以長刁風若有如從前爭鬪傷人及搶奪擾民之事該督撫卽行奏聞請旨於彼地立刻正法決不寬貸可預行曉諭各省運丁知之

雍正二年十月二十三日戶部奏直屬九郡豐收惟霸州七州縣田禾偶有淹損應准該撫所奏停

徵奉

上諭直隸九府今秋歲登大有惟霸州東安大城武清玉田寶坻梁城所七州縣所地畝稍被水傷朕卽諭巡撫李維鈞將倉糧發賑今李維鈞奏請將七州縣所被水村莊本年錢糧緩至雍正三年麥收後帶徵但念此小民生全初遂若將今歲錢糧歸於明歲帶徵則新舊之賦輸納於一年之內物力維艱勢難兼顧夫百姓雖登樂利猶資惠養有方爾部行文該撫著將霸州等七州縣所被水村莊雖未成災今年應徵錢糧內或應有蠲免之處詳查定議具題務紓民

力以副朕軫念黎元至意

雍正三年六月二十日

諭內閣直隸大名府屬之滑縣濬縣內黃縣爲河南漕運所經地雖接壤而屬則隔省聞多有呼應不靈之處以致河南糧艘年年遲誤糧運乃河南專責且大名府所屬計一州十縣彰德府所屬只一州六縣衛輝府所屬只六縣若以滑濬內黃三縣分隸彰德衛輝則多寡旣均而於運道得專責成亦有裨益著九卿速議具奏

雍正二年七月十一日

諭舊歲直隸總督李維鈞奏稱畿輔地方每有蝗蝻之害土人虔禱於劉猛將軍之廟則蝗不爲災朕念切痼瘼凡事之有益於民生者皆欲推廣行之且禦災捍患之神載在祀典卽大田之詩亦云去其螟螣及其蝻賊無害我田穉田祖有神秉畀炎火是蝗蝻之害古人亦未嘗不藉神力以爲之驅除也曾以此密諭數省督撫留意以爲備蝗之一端今兩江總督查弼納奏稱江南地方有爲劉猛將軍立廟之處則無蝗蝻之害其未曾立廟之處則不能無蝗此乃查弼納偏狹之見譏諷朕惑於鬼神專恃祈禱以爲消弭

災祲之方也其他督撫亦多有設法祈雨祈晴之奏者夫天人之理感應不爽凡水旱蝗蝻之災或朝廷有失政則

天示此以警之或一方之大吏不能公正宜猷或郡縣守令不能循良敷化又或一郡一邑之中風俗澆漓人心險偽以致陰陽沴戾災祲薦臻所謂人事失於下則天道變於上也故朕一聞各直省雨暘愆期必深自修省思改闕失朝夕乾惕必誠必敬冀以挽回

天意爾等封疆大吏暨司牧之官以及居民人等亦當恐懼修省交相誠勉改愆悔過崇實去僞夫人事既盡

自然感召

天和災祲可消豐穰可致此桑林之禱所以捷於影響也蓋惟以恐懼修省誠敬感格爲本至於祈禱鬼神不過借以達誠心耳若專事祈禱以爲消弭災祲之方而置恐懼修省誠敬感格於不事是未免濬流而舍其源執末而遺其本矣亦安有濟乎况

上天好生栽培傾覆原因物之自召而愚民無知每遇水旱不知返躬省咎更爾多生怨憾罪愆重增此乖戾之氣上干

天和以致頻遭降罰荒歉連年多由於此也朕實有見於

天人感應之至理而斷不惑於鬼神巫禱之俗習故
不惜反覆明晰言之內外臣工黎庶其共體朕意

雍正三年八月初一日

諭戶部侍郎蔣廷錫內務府總管來保今年六七月間
京師雨水較多聞京城八倉內頗有積水支領甲米
車輛來往甚艱其城外萬安倉附近城墻城上瀉水
流下倉內道路亦復泥濘如何令各倉積水通洩不
致停滯低窪處作何修墊俾收放糧米之地高燥潔
淨既便於車輛行走亦不致糧米狼籍又各倉廩底
或應鋪墊石灰或應支架平板爾等到各倉詳悉查

看具奏

雍正三年八月初三日

上諭今年天津一帶雨水頗大著將漕糧截留二十萬
石存貯天津新蓋廩內其截留事宜照雍正元年舊
例行

雍正三年八月十六日

諭倉場總督今年雨水過多米價騰貴可將廩內舊貯
米減色平糶并行文直隸總督凡近水州縣可通舟
楫者俱令赴通州領運平糶便民

雍正三年八月十八日

諭今年夏秋直隸地方雨水過多恐秋禾歉收窮民乏食已降諭旨令該地方官詳查賑濟朕早夜思維深切軫念若於賑濟之外有城工應修理者修理數處俾窮民傭工藉以養贍更爲有益著於六部中選擇司官六員編檢庶常內選擇四員御史內選擇二員中書內選擇一員俱在漢官中選其爲人老實謹慎可用者帶來引見朕再指示修理城工地方令其前往再者連歲口外收成頗好朕曾降旨進口糶賣米糧不得禁止近聞各口官弁於米糧進口之時每借稽查爲名多方勒索以致阻滯著兵部行文各口毋得仍蹈前轍使米糧不得通行

雍正三年八月二十六日

上諭前於天津蓋造倉廩原備截留漕米是以朕諭托時等將湖北湖南之米截留二十萬石存貯天津托時因奏天津倉廩地勢卑濕廩底須鋪墊乾草以隔潮氣昨牛鈕奏稱墊草亦不免沓爛如此則截留漕米無益前所降諭旨截留之米可仍令抵通歸倉當時蓋造倉廩原係李維鈞及地方官員經手乃並不相度高燥之地草率營建著托時前往天津會同莽鵠立柯喬年詳審地形或另擇高阜之處或將舊基

培墊交與李維鈞親同當時經手之員賠補修造卽著莽鵠立柯喬年監督工程至於直隸州縣倉穀李維鈞曾奏虧空無多今歲秋收卽可全補無缺今蔡珽奏稱清苑倉穀並無顆粒清苑爲保定附郭之縣倉穀尚虧空如此則他處可知李維鈞前此所奏不實著大學士會同刑部問明具奏又蔡珽奏稱目下省城米價騰貴今令臬司浦文焯攜帶脚價親至天津將截留漕米星速運三萬石以二萬石直至省城平糶以一萬石量留沿途被水之處以救眉急等語畿輔之地百姓艱食朕心深爲軫念著托時到天津

將漕米撥三萬石交與浦文焯作速運去今歲近京一帶雨水較多恐此米尚不敷用再令陳守創將通倉變色米六成以上者撥十萬石交與余甸蔡起俊動用脚價運至天津或平糶或賑濟應運何處聽蔡珽調度余甸蔡起俊悉聽蔡珽指揮協助賑恤朕念直隸地方低窪之處衆水積而不洩以致但有水之害而無水之利疏濬之道不可不講已諭朱軾張燦經理此事聞陝西潼商道王全臣在陝挑濬秦渠熟悉水利其在軍前歷年亦著勞績而年羹堯綽奇屢次叅奏若非朕保全之伊早罹重罪矣可著王全臣

來京其漕商道員缺著松茂道孟以恂調補凡王全臣軍前之事俱交與孟以恂料理王全臣卽著來京不必俟孟以恂交代清楚朕另降旨與孟以恂其松茂道員缺著岳鍾琪揀選題補

雍正三年九月初三日

諭大學士等前因天津倉廩潮濕不能收貯米石故停止截留今據蔡珽奏稱天津倉廩雖不能貯米可分發各州縣存貯以備賑濟請仍截留二十萬石等語戶部作速派賢能滿漢司官各一員前往天津會同倉場總督托時將河南小米截留二十萬石一面行

文蔡珽令其酌量應貯米之州縣撥派官員於天津地方領運收貯備賑前李維鈞奏請賑濟一月朕思賑濟原不可拘定日期昨降旨修理城工春暖之時小民可藉以餬口但恐三冬未能接濟可行文蔡珽再賑濟三個月務令小民得所現今遣增壽等前往奉天採買米石運至天津可卽行文伊等於米石之外採買高粱或十萬石或七八萬石一併運至天津於賑濟大有裨益爾等卽遵諭行

雍正三年九月初八日順天府府尹張令璜奏
耕田疊產瑞穀請撰文立碑奉

上諭據奏藉田壘產瑞穀順天紳衿耆庶籲請撰文立碑以昭盛德以示來茲等語藉田嘉穀雖有九穗之瑞但今歲畿輔地方被水小民乏食朕方修省之不暇所請撰文立碑勒石不必行

雍正三年十月二十四日

上諭五城煮賑舊例自十月初一日起至次年三月二十日止每城每日發米二石柴薪銀一兩今歲直隸各州縣截留漕米二十三萬石仍復運送通倉米十萬石令散賑平糶但恐各處來京就食之民尚多每城日給米二石或不敷用著每日各增米二石柴薪

銀亦倍之各該巡城御史親率司坊官散給都察院堂官不時稽查務使窮民得霑實惠以副朕愛養軫恤之至意

雍正三年十一月初一日

諭大學士等今年直隸州縣被水小民乏食朕軫念殷切除截留漕米發給常平倉穀外又將通倉米六成以上者著托時陳守創親交余甸蔡起俊運赴天津分散賑糶於被水之州縣今朕訪得所發之米朽爛不堪現有米樣二種在此爾等共看其高者不過三四成低者全屬灰土朕軫恤災黎宵旰憂勞無時或

釋乃托時等全不仰體朕心將此無用之米運給各處有名無實小民何所資藉托時陳守創等皆由小臣拔至卿貳不知感激朕恩爲朕愛養百姓殊爲可惡此次姑從寬免容其改過自新嗣後若再不實心辦事定嚴加治罪此已運成色米十萬石著賞給各處窮民再另發六成以上米十萬石令托時陳守創余甸蔡起俊自備脚價運往天津再今歲秋季所發官俸兵糧米色俱不好嗣後若再如此亦必從重治罪康熙五十五年曾發通倉米五萬石分貯各州縣備用歷年已久聞俱陳腐甚爲有司之累著從寬豁

免莽鵠立奏稱直隸按察司浦文焯修倉推諉朕曾詢問蔡珽據奏現有賑濟事務留浦文焯料理今賑濟已有頭緒浦文焯著解任修倉若辦理得好朕尚有任用之處倘仍前怠忽必加重處

雍正三年十一月初五日

上諭滿州兵丁於技勇武藝俱已精練惟向來未習水師今欲於天津地方設立水師營分撥八旗滿洲前往駐防操演似屬有益其應於何處駐劄設立幾營派兵若干用船若干竝如何製造船隻如何演習兵丁之處可會同拉錫朱軾張廷玉蔣廷錫詳議具奏

雍正三年十二月十九日

諭巡視五城御史今年天氣寒冷聞外間無屋居止之窮民竟有受凍傷損者朕心深為憫惻朕思居民中豈無愷悌好善之人但因慮及稽查牽累不敢輕易收留此亦人情之常爾等可留心照看使寒夜不致露處若有好義之人容其棲息者不必禁阻至明春二月和暖便可無慮爾等巡城之職固在禁民為非亦當恤窮救困嗣後倘有凍斃之人經朕訪聞爾等不得辭其責

雍正三年十二月十九日

上諭今年天氣甚冷京城多有窮民彰義門安定門外向有養濟院此二處著將變色米賞給一百石煮粥賑濟傳諭倉場侍郎將米樣呈驗然後賞給

雍正三年十二月二十三日

上諭直隸地方向來旱澇無備皆因水患未除水利未興所致朕宵旰軫念莫釋於懷特命怡親王及大學士朱軾前往查勘今據查明繪圖陳奏所議甚為明晰且於一月之內衝寒往返而能歷勘周詳區畫悉當以從來未有之工程照此措置似乎可收實效具見為國計民生盡心經畫甚屬可嘉著九卿速議具

奏至於工程應用人員若交與九卿揀選恐有掣肘
卽令怡親王及朱軾揀選請旨其從前差往修城修
堤之員俱著於水利工程處一同辦理

畿輔通志卷之三

畿輔通志卷之四

詔諭

皇上諭旨

雍正四年正月初三日

上諭發通倉足五成米十萬石運至天津照前交與天
津道通永道爲七十五州縣加賑一月之用

雍正四年正月二十九日

上諭直隸地方去歲雨水過多損傷禾稼小民失業朕
深憫之已令五城煮粥賑濟以惠窮民又恐人多米
少復諭都察院倉場於五城各加米石賑濟但念東

直西直安定右安廣寧五門向來未設飯廠今恐就食者多未免稍有不足且路途遙遠者難以趕赴用是再沛恩膏著於五城飯廠每日每城賑米六石外加米二石再於東直等門添設飯廠五處每日每廠給米二石著都察院派滿漢御史五員專管辦理其需用人員著都察院順天府酌量派出并著堂官不時稽查務使窮民均沾實惠以三月二十日爲止都察院順天府卽遵諭行

雍正四年二月初七日

上諭去年近京地方雨水稍多收成歉薄窮民乏食朕心軫念蠲免錢糧發通倉米糧四五十萬石交與欽差及地方官通行賑濟又念失業之民覓食來京者多故於五城飯廠兩次加添米石又於五門增設飯廠五處俾窮民得以養給但目前雖逐日散賑究非長策春氣漸暖正宜播種此等窮民不得早還故土必致有悞春耕應如何設法資送或由陸路或由水路俾得各回原籍復其本業大學士會同都統拉錫步軍統領阿齊圖并都察院堂官及五城御史詳議具奏

雍正四年二月十一日

上諭直隸近京地方去歲被水歉收朕心軫念已疊沛恩膏毋使失所其覓食來京者又復增給米石添設飯廠俾窮民得以養給近因東作方興正令大臣等酌議設法資送貧民回籍不使有誤春耕乃畿輔覓食之民前來京師者日衆是必傳聞京師加恩賑濟是以無知愚民希冀非分之望反舍其耕種之本業則大負朕綏輯窮黎之盛心矣况本地旣已散賑若實係窮民則已入本縣冊籍何以又遠赴京師其中不無假冒可卽傳諭順天府大興宛平二縣及近京地方文武官員將續來之民曉諭攔阻目今春氣和暖其有田可耕者卽當乘時播種其無田可耕者則各處皆有工程或修堤岸或開水利正需人力以興土功伊等回籍就近傭工度日不致離棄鄉井轉徙外方實爲謀生善策可嚴切諭令伊等知之并將此行文直隸總督

雍正四年二月十三日

上諭據直隸總督蔡珽奏稱從前將通倉之米運至保定糶賣以濟民食今已糶完頃值青黃不接之時民間糶米艱難懇請再賜給發等語著卽行文倉場侍郎將七成以上之米速發二萬五千石照前運至天

津交與蔡珽運往保定

雍正四年二月十五日

諭戶部去秋北方多雨直隸所屬七十四州縣被水歉收朕心深爲軫恤疊沛恩澤加惠窮黎已將七十四州縣被災田畝之錢糧照例蠲免其餘應徵額賦又復停徵在案朕思一省之中既有七十餘州縣收成歉薄則必有向鄰封隔縣謀生覓食之人當此青黃不接之時閭閻豈能充裕若仍照舊徵收錢糧民力輸將未免竭蹶用是特頒諭旨施恩於常格之外將雍正四年通省應徵額賦一體停其徵收俾民力寬

舒各得用功於南畝以副朕勤恤民隱之至意爾部卽遵諭行

雍正四年三月十二日

上諭去歲畿南被水深軫朕懷雖截漕發粟賑糶頻施然猶恐小民甫經災沴之後無力供輸是以又特降諭旨將雍正四年錢糧通省俱令緩徵夫今年錢糧尚且緩徵則從前未完之項豈有轉行急徵之理今聞地方官竟有仍追比前欠者漠視民瘼莫此爲甚深負朕憂念斯民之至意著傳旨直隸總督速飭各地方官凡一切舊欠錢糧一槩緩徵其所有兵餉工

料各項需用之處俱動藩庫銀兩撥給不得短少扣
尅如地方官仍有私徵等弊一經查出定行從重治
罪

雍正四年四月十四日

諭九卿怡親王陳奏畿輔西南水利情形並繪圖進呈
朕披覽甚爲明晰著交與九卿會議具奏怡親王等
於去冬今春奉命查勘水利情形前後往返三月餘
而於直隸地方東西南三面數千里之廣俱身歷其
地不憚煩勞凡巨川細流莫不窮源竟委相度周詳
且因地制宜準今酌古曲盡籌畫以期有益於民生

公忠爲國實心辦理甚屬可嘉何國宗等同事多人
前往查看運河將及半年之久所清不過數河而小
丹河一節何國宗與田文鏡各持意見彼此參差不
肯虛心商酌以濟公事今又仍持兩議爭論具奏較
之怡親王何如衆人自有公論也

雍正四年四月十八日

上諭去歲畿南被水朕軫念民生除截漕賑濟種種加
恩外又特命怡親王等親身前往查勘地理情形以
除水患以興水利今一切工程事務雖有分發効力
人員但地非素經人非素轄恐有呼應不靈之處必

得本處地方官公同實心協辦始克有濟且事權必欲專一方可奏功凡直隸地方文武官於水利事務務須與分發効力人員秉公和衷協助如有漠視推諉及阻撓者俱著怡親王題叅有實力奉公者亦著怡親王保題

雍正四年五月十二日

上諭五月設立米廠俱在城外所有城內僻巷老弱窮民糴買甚難著該城御史在城內添設米廠幾處以便窮民糴買

雍正四年五月二十九日

上諭聞京城近日米價騰貴雖因天氣連陰然一時驟長恐有奸人囤積射利借此擾亂情弊著都察院轉飭五城曉諭各行戶不得過高價值勒索小民倘有囤積遏糴不遵勸諭者該城御史密行訪察從重治罪將京倉好米發五萬石分給五城每城領米一萬石照例立廠委員平糴其價值著九卿定議具奏此所糴米石俟市價平減卽行停止其存剩之米卽存貯該城將來若市價一貴卽將此米平糴以濟窮民若此米用完仍需平糴著都察院再行奏請

雍正四年六月初一日

論大學士九卿翰詹科道朕自卽位以來思念

皇考付託之重惟恐天下之人有一夫一婦不獲其所自朝至夜殫心竭慮晷刻靡寧無非欲休養生澄清吏治使中外永享昇平之福以仰慰我

聖祖仁皇帝在

天之靈卽如前歲雨澤偶愆去歲畿輔被潦朕在宮中虔

禱

上天叩首至於傷腫中夜屢起瞻望雲色以卜晴雨祈禱之時嘗終日飲膳不御不止於減膳而已此皆朕默盡其心不肯令人知之在朕心以爲敬

天勤民勵精圖治之意至真至切可以自盡無少愧歉於中故凡下詔求言之事未曾舉行今夏二麥登場之時適值連雨目前雨雖暫晴尚未開霽朕爲小民深切軫念且奸民郭允進私貼謠歌有軍民怨新主之語朕心因此反躬自省不能無疑或用人行政之間在朕已實盡其心而衆人觀論尚有以爲未當之處亦未可知總之千萬人之中有一二人或有異議朕心卽欲省察而權衡之爾內閣九卿翰詹科道等官皆朕簡用之員職在勸誼同休戚若朕身有過可直言無隱政治得失亦卽各抒已見據實陳奏朕必

嘉納勿視爲具文勿有所瞻顧苟且塞責重負朕真切清問之至意

雍正四年七月十五日

上諭據鄂爾奇繆沅奏稱直隸借糶倉穀弊端種種無非地方官巧爲掩飾虧空之計向來直隸倉穀虧缺甚多朕知之甚悉各官惟恐敗露故設計彌縫詳請借糶李紱爲其所欺遂代爲題請且未經奉旨卽先爲散給及派員往查又轉停止覽鄂爾奇等所奏各官情弊顯然凡此等州縣官員若仍留原任將來假公濟私那新掩舊必至刻剝小民虧欠正項而地方

倉廩始終不得清楚可將巧稱倉穀出借各官悉行解任著吏部將投供到部候補候選之州縣官俱帶來引見朕親自選定人數其鄂爾奇等已經到過之正定順德大名廣平保定五府所屬贊皇等二十一州縣著卽將揀選人員掣籤發往鄂爾奇等未到之永平宣化順天三府所屬之二十一州縣俟伊等到彼查出有出借倉糧者卽咨吏部令籤掣人員前往代之以以上各州縣借出之穀俱著解任之官員自行催還以一年爲限限內全完者仍准卽行另補若先期速完者隨到隨卽另補若逾限不還者治以那移

虧空之罪如此辦理則虧空之員不得復居現任掾制小民那移出納而接任之員交代井然又無前後不清之項若果係借欠在民按數催還其原官仍可另補於公私均有裨益李紱既不能稽查屬員之巧飾虧空轉爲伊等欺朦具題代請又不候旨卽令各屬擅自給發甚屬不合著嚴飭行又鄂爾奇等奏稱阜平贊皇等處違例將穀借給兵丁向來有無借給兵丁之例著九卿察明具奏聞直隸各處倉廩久未修理傾圮者多此皆地方官漫不經心李維鈞不實心任事之故著李紱嚴飭各屬設法速行修整

雍正四年七月二十八日直隸總督李紱奏昌黎縣知縣李士著乞休奉

上諭昌黎縣知縣李士著現因私借倉穀解任清還借項今以老病乞休顯有虧空穀石情弊著將李士著留住昌黎交與新令俟伊將借動之穀清還申請該督報部後准其回籍直隸解任之四十二州縣知州知縣等官俱照此例留住原地方清楚倉穀

雍正四年八月初九日

上諭從來直隸江南兩省盜案多於別省雍正二年三年間李維鈞爲直隸總督節制提鎮遵朕諭旨嚴拏

盜賊故直隸盜案因而甚少自去冬以至今春盜案復多若云因去秋水潦歉收所致何以彼時正當被災乏食之際不聞盜賊肆行偷竊至今春夏二麥豐收小民反爲此犯法之事是必有爲首積盜糾合匪類巧於漏網各州縣被竊之處雖多而奸滑之盜首不過數人窩藏之巢穴亦不過數處而已畿輔之地爲四方觀瞻豈可聽宵小之潛藏任有司之疎忽朕特降諭旨從雍正五年爲始凡直隸盜案仍照舊例不分首從皆斬不准寬貸蓋除盜安民乃國家政事之要應加懲創李紱職司表率安可漠不經心可

速飭屬員嚴加緝捕務令得其根柢以清盜源若仍前疎忽定將李紱治以重罪並諭直隸提鎮等官各飭屬員稽查防汛以靖地方毋得疎縱自干罪戾在京步軍統領衙門及巡捕營弁五城御史及司坊官員各宜盡心訪緝以副詰奸弭盜之職

雍正四年十月十一日

諭大學士九卿等直隸地方旗民雜處往往以強凌弱勢力相加而謹樸良民常被欺壓因而相習於強悍之風不知峻改而風俗不能臻於淳厚朕勵精圖治欲四海之廣道德一而風俗同况輦轂之下首善之

區尤當整飭化導以爲萬邦之式今欲將滿漢漢軍御史各差二員令其巡查八府地方凡旗下告退之官員及在屯之莊頭內監之族戚與在籍之鄉紳衿監倘有不安本分凌虐良民不畏官吏恣行暴悍者或卽行懲治或具本叅奏其地方命盜案件亦聽其查訪有應在本地方歸結者卽會同地方有司秉公歸結有應奏聞者卽行奏聞務使豪強斂跡良善安居以副朕移風易俗之至意其如何遣官分巡之處爾等定議具奏

雍正四年十二月十九日

諭五城官員軍民人等制錢乃日用之所必需務使充足流通始便民間之用國家開局年年鼓鑄而京師錢文不見加增外省地方亦未流布是必有銷燬制錢製造器皿以致錢文短少錢價日昂其中情弊顯然朕念切民生屢降諭旨而錢價仍未平減是以禁用黃銅器皿凡民間所有俱給價令其交官以資鼓鑄此朕悉心籌畫至再至三專爲民間資生便用起見並非朕有需用銅筋之處而廣收民間之銅器於內府也似此有益於民間之事爾等當卽踴躍急公欣然交納使錢文贏餘日用贍足尚可待於上官稽

查催促耶况銅器交官皆如數領受價值又何樂而不爲耶且民間器皿非必定需黃銅製造其在有力之家則白銅紅銅皆非難得之物而無力之家如木盆磁器價廉工省亦未嘗不適於用非若錢文爲人所萬不可缺者朕爲爾等日用之計如此籌畫爾等自爲日用之計更當鼓舞奉行何必遷延觀望令公私俱無所裨益乎與其藏匿於家將來限滿三年犯禁獲罪何如彼此相勸早爲交納旣得價值而又受錢價減省之利益乎朕憫爾等愚昧無知再頒此旨遵行曉諭其咸體朕意

畿輔通志卷之五

詔諭

皇上諭旨

雍正五年二月初七日

上諭修舉水利種植樹木等事原為利濟民生必須詳
 諭勸導令其鼓舞從事方有裨益不得繩之以法若
 地方官員因關係考成督課嚴急則小民轉受其擾
 矣著直隸學臣轉飭教職各官切加曉諭不時勸課
 使小民踴躍興作若地方官員怠忽不加勸導或有
 逼勒過嚴者著學臣稽察奏報三路巡察御史亦著

善爲勸導悉心稽察如地方官有奉行不善之處卽行據實奏聞

雍正五年閏三月十八日

上諭保定府舉人蘇庭條奏內稱直隸帶徵錢糧州縣併催以菜色初起之民當三春絕乏之日辦理實難請俟二麥登場三秋納稼之後酌年歲豐歉以定帶徵多寡之數等語直隸地方前歲被水歉收朕念切痾瘼焦勞倍切至頒發倉儲七十萬石以爲賑糶之需又興修各處城垣水利工程約費帑金數十萬兩俾小民傭工以餬其口撫恤之政無所不周查賑之

員絡繹於道所以爲畿輔百姓謀安全者已盡朕心力矣幸荷

上天鑒佑上年二麥大收秋成亦屬豐稔遠近黎庶共樂安居無不感朕恩澤至於帶徵錢糧乃國家惟正之供朕何敢市私恩以邀譽今旣格外施仁寬期於從前而補償於今日小民淳樸者多斷不忍於受恩之餘又存拖欠國課之想假使民力果有不足該地方大吏有司自然體朕愛養元元之心暫緩催科之令必不至迫急滋擾也蘇庭旣係舉人乃讀書明理者尤當感戴朕恩以完課急公勸導百姓今乃倡議緩

徵希冀僥倖以惑人心並言小民菜色初起夫菜色初起四字或可用之於雍正三年秋成被水之後奉旨賑恤之時而蘇庭用之於雍正四年秋成豐稔之後尚得謂之公論乎直隸紳衿包納錢糧積弊種種衆所共知蘇庭必係此等之人故爲此奏以自便其私著將蘇庭革去舉人發與總督宜兆熊劉師恕將蘇庭向日居鄉爲人一併查明具奏

雍正五年閏三月十九日

上諭三農仰資雨澤所重尤在春時今年三月間直隸地方雨暘不一朕念切民依時時體訪昨閏三月十

一日京師及近畿之地俱得雨澤而薊州咫尺間僅有微雨不能霑足朕向來屢降諭旨凡水旱災稜之故或因朝廷政事闕失或因該省大吏及該郡邑有司有乖職守各致愆尤或因本地風俗偷薄人情澆漓此數者皆足以上干

天和致使陰陽違序古人言此最爲詳備而朕研究天人感應之理確然知其不爽是以往復諄諄訓諭中外期於共相儆勉修人事以格

天心此念無一刻或忘也今春畿輔遠近雨澤不均朕再四思維不得其故昨見保定府舉人蘇庭條奏請將

本年帶徵錢糧緩其徵收而又故爲迫切愁苦之詞
加以菜色字樣欲以聳動朕聽卽此可知小民之心
無時饜足當收成偶歉之時蒙朕多方拯恤比歲緩
徵而小民皆相習視爲固然迨及歲已豐熟全不念
租賦乃惟正之供輸將乃分內之事仍思遷延僥倖
遂其私心轉覺納科完糧爲意外之事相對輾轉志
氣不舒遂致上干

天和甘雨不能應時而降此亦理勢之必然者也况自私
自利之念蒙蔽於中而非理非分之望擾攘於懷既
忘朝廷撫綏保護之深恩又忘

上天錫福惠民之大德人情如此尙待謂之風淳俗厚而
可邀

上天之眷佑乎夫錢糧出於地畝凡應完國課者皆係有
產業之家並非無力窮民可比豈有上年豐收之時
全不籌及於今年國課之理假若民力果屬艱難該
地方大吏有司自然體朕宵旰勤民之至意暫緩催
科斷不忍過於迫急竭民力而違朕旨也朕因小民
習染旣久私欲難除不識君民一體之情不知天人
感召之理致于

上蒼譴責垂慈示儆朕心深用憫惻切加訓飭果能遵朕

諭旨安分守法循理奉公則俯仰寬舒心志暢適古
八云和氣致祥將見五風十雨大有頻書斷不憂水
旱災稜之爲累若宵小無知以爲朕因催科降此諭
旨則不但不知朕教養之深恩抑且昧天人感應之
理矣著直隸總督督率有司體恤民隱教養兼施將
朕此旨通行出示曉諭務使遠鄉僻壤之民咸令詳
悉知之

雍正五年四月初九日吏部等衙門議覆東光縣
知縣鄭三才條奏各款奉

上諭鄭三才身任東光縣知縣其所奏必有確知灼見

伊旣稱泊河通判兼轄數縣一身難於巡查差役又
滋需索等語部議交與該督撫嚴行查禁督撫所轄
地方遼濶此等細事恐難周知或應添設官員分任
其事或應交與巡察御史稽查之處著直隸總督等
定議具奏又鄭三才奏稱東光縣地棍紳衿把持包
攬挾制官府拖累平民弊端種種自必實有其人著
直隸總督等嚴行約束該巡察御史亦令稽查以儆
刁風

雍正五年四月十七日

諭營田水利官員等朕以畿輔之地水患未除水利未

興宵旰焦勞修建大功欲登民生於安阜爾等官員皆情願效力經朕引見命往者自當仰體朕心朝夕黽勉方爲稱職將來朕自加恩今聞在工人員多有因循怠忽不肯實心出力者揣爾等之意以爲信任怡親王大學士朱軾而爾等在怡親王朱軾蔭庇之下可以免於過愆遂耽逸偷安苟且塞責或有見從前議叙人員効力未久俱得邀恩遂各存僥倖之念而無誠實辦事之心此等意見愚昧已極朕只信任怡親王朱軾而怡親王朱軾所用之人朕豈皆深信而宥其過愆乎况怡親王朱軾公忠體國若爾等不肯盡力工程怡親王朱軾亦豈肯徇情而稍爲容隱乎爲此特行曉諭嗣後爾等可痛加檢改勉力急公倘仍前怠玩遲悞公事必從重治罪若係已經議叙之員先勤而後怠其罪更不可追再怡親王朱軾不能親身到工凡督率在工人員稽察勤惰分別優劣實係段如蕙張璨之專責段如蕙爲人柔善張璨涉於浮誇不能整飭甚負朕擢用委任之意亦著改除舊習倘瞻顧情面苟且姑容朕嚴加議處之時悔之不及矣

雍正五年四月二十一日

上諭方冬魁乃旗下閒散人而居鄉者必係懶惰無用之人理宜安分居家今因飲酒沉醉見張四不會讓坐遂恃強詈罵扭打以致張四情急刀戳殞命向來居鄉旗人倚恃強力欺凌民人者甚多卽方冬魁之事可見著將張四免其死罪枷號兩個月責四十板從輕發落以爲旗人不論道理恃強凌弱欺壓民人者之戒著通行曉諭八旗及各處屯莊居住之旗人咸使聞知

雍正五年四月二十九日

諭八旗大臣內務府總管直隸州縣緝拿逃盜每每踪

跡察訪至內府莊頭之家而莊頭等護庇不令捕役進家搜捕以致直隸逃人盜案不能絕跡此皆由內府莊頭藏匿之故再八旗在屯居住人等多係不思上進怠惰浮薄之輩在屯閒居不守法度竟有窩藏逃盜欺凌百姓好事妄爲者此等內府莊頭並在屯與民人雜處之旗人若不嚴加約束必至妄生事端八旗都統內務府總管等行文直隸總督及巡察御史嗣後內府莊頭及鄉居旗人家中有窩藏逃盜者地方官差役搜捕有抗拒者卽將窩家一併拏究再或有不守本分酗酒生事妄爲者該地方官卽行詳

報總督若係旗人由總督移咨該旗係內府莊頭移咨內務府該旗及內務府將應行辦理者卽行辦理應行拏送者卽行拏送其總督移咨事件每月彙題一次以備朕之詢問其移咨爾等事件若有遲延以致違悞者將爾等治罪若地方官徇隱不行詳報總督或已詳報總督而總督不行移咨各該管處者被巡察御史查出題叅將不行詳報之州縣及不行移咨之總督一併嚴加議處巡察御史徇隱不行查叅或別案發覺或經朕訪聞務必重治其罪如此立法則內府莊頭及居鄉旗人各知警戒畏法守分而直隸地方窩藏逃盜之弊可清於鄉居旗人百姓亦大有裨益矣

雍正五年六月初八日

上諭倉場米石乃國家第一要務關係最爲重大試思此項米石民間輸納何等辛苦官員徵解何等煩勞且糧艘運送京師何等煩難一顆一粒皆當愛惜不忍輕忽朕爲此一事宵旰焦勞時時切加訓飭至再至三且曾降旨令修理倉廩等項不惜多費帑金務期完固此臣民所共知者托時陳守創身爲倉場侍郎自當仰體朕心悉心料理使倉廩堅固天庾充盈

不致霉爛乃爲稱職昨朕特遣大臣等前往查看則見京通各處倉廩屋瓦滲漏牆壁損壞者十居八九所貯米石漸至潮濕霉爛夫以如珠如玉之米糧而視爲泥沙之棄擲忍心害理莫此爲甚若不嚴行稽察無以儆怠忽而清弊端在京十倉每倉或都統或副都統各派一員御史中不論滿漢每倉各派一員專任稽察之責其米石出入支放奏銷事件不必經管仍屬倉場侍郎管理其房屋滲漏墻垣損壞與倉內鋪墊及匪類偷竊一切情弊俱交與派出之都統副都統御史稽察遇有查出之處卽行知倉場侍郎

若倉場侍郎等不卽辦理妥協敢致遲延著派出之都統副都統御史奏聞倘有應行查出之處不行查出則將缺少米石應賠之項著落倉場監督等官與派出之都統副都統御史分賠其通州三倉卽照此例交與通永道通州副將稽察其失察分賠之處亦照依京倉施行

雍正五年六月二十二日

上諭據怡親王奏稱玉田縣之還鄉河堤岸衝決附近之田禾廬舍有被淹傷損之處朕心深爲軫念著散職大臣常明率同御史勒音特錢兆沆二人前往悉

心查勘並帶帑金二萬兩速行賑濟若有動用倉穀之處將本縣倉穀卽行動用務使小民得所不致流離再被水地畝本年應納之錢糧著行緩徵朕本欲加恩將本年錢糧全免但恐此時有已經完納者著將被水之地明年錢糧蠲免一年該地方有司應加意撫綏以副朕愛養窮民之至意

雍正五年六月二十八日

上諭倉場米石乃國計民命所關顆粒皆當珍惜必厥座堅完無損壞滲漏之處米粟方不至於霉爛國家政務莫重於此朕宵旰勤勞時切厘念百計經營布

置卽如殿底之板及四圍之墻尙不惜數十萬帑金創造修整則身任倉場之責者自當加意慎重以仰副朕懷倉廩上蓋修理乃極易之事况伊等屢次奏過不時動茶果銀兩修理朕意必然完固豈有厥座損漏至此而竟置若罔聞托時陳守創身任倉場全不實心料理以致各倉廩座損壞滲漏處凡九百二十九座米粟竟有霉爛者負朕委任深恩實出意料之外况托時陳守創常常進見亦並無一語奏聞甚爲溺職著將托時陳守創及各倉滿漢監督盡行革職解任至御史殷式訓專司查倉之責乃敢扶同徇

隱亦著革職解任凡各廩座損壞滲漏之處俱著動支正項錢糧修理若仍交與舊任各員必致苟且塞責虛費錢糧不能實在完整著欽差都統御史通承道等同新任倉場侍郎監督官員實心料理務期修理完固仍著托時陳守創殷式訓及解任之舊監督一同看視每倉修理動支錢糧若干卽著本倉監督與托時陳守創殷式訓分賠補項其有霉爛米石亦著伊等照數分賠其舊任監督著議政王大臣會同大學士詳加訊問如有本倉廩座全無損漏者仍留原任將新補監督撤回如從前曾將滲漏之處詳報

倉場者著將情由聲明奏聞至各倉監督應賠之項如照數全完准與開復凡事當積玩相沿之時非大加改易不能整頓吏部侍郎岳爾岱順天府府尹劉於義著補授倉場侍郎其各倉監督員缺著各部院速卽挑選人員引見順天府府尹事務著申大成暫行署理

雍正五年七月十二日

上諭派出那蘇圖傳泰班第每人帶銀二萬兩前往直隸地方有應散賑之處卽行賑濟務令窮民得所

雍正五年七月二十九日

諭直省總督巡撫等自雍正二年以來朕躬耕藉田而藉田之中每歲必產嘉穀上年自雙穗至於九穗今歲則白雙穗至於十三穗在廷諸臣及京都耆庶皆驚訝以爲奇朕之宣示於衆者並非矜詡誇張以爲祥瑞蓋實有見於天人感召之理捷於影響而朕敬天之心至誠至切願與內外大小臣工共勉之也稼穡爲天地之寶民命攸關我

聖祖仁皇帝臨御六十餘年無刻不以重農力穡爲先務仰觀天時俯察地利辨土性而課人功咨雨暘而防旱澇綢繆區畫旰食宵衣偶遇雨澤愆期

聖心憂勞之切侍側臣子皆惶悚不寧所以爲萬世謀粒食者至矣盡矣朕朝夕瞻仰者四十餘年今纘承大統竭誠效法念切民依每念虔祀

先農躬耕

帝藉仰蒙

上天眷佑疊錫嘉禾信而可徵纖毫不爽是以特頒諭旨令各省守土官共舉耕藉之禮爲萬方百姓祈禱秋成今見各省督撫奏報前來處處風雨均調春麥秋禾並登豐稔雖邊遠荒僻之地亦慶有秋惟直隸湖廣安徽數州縣近水最低之處常年被澇者畧有浸

注亦不爲災是今歲可稱大有年矣朕感

上帝之垂慈慶下民之受福而推求其故良由今年各省
初耕耜田各該有司自然小心敬慎齋戒虔誠是以
感格

上蒼而獲此盈寧之錫倘從此益加敬謹不懈初心則歲
歲屢豐可以預必爾督撫等可通行曉諭所屬官民
當凜

帝鑒之匪遙勿視耕耜爲故事永矢嚴格以迓

天和天下臣民受福斯朕之福也思之慎之毋忽朕言

雍正五年九月初十日營田水利府參奏定州知

州程恂等違悞工程奉

上諭朕爲直隸地方興修田畝水利以厚民生特令王
大臣等經理其事該地方有司自應休戚相關視同
一體畿輔密邇京師朕時加訪問如保定府知府李
正茂前在知縣任內時正值大水之際伊防護堤工
殫心竭力實爲盡職之賢員朕已加恩擢用其有阻
撓公事及玩忽工程者於國法斷難寬貸此所參程
恂駱爲香俱著革職在營田水利工程效力行走程
恂荒廢未開之田畝著仍交與程恂營治倘明年再
有遲悞定行從重治罪徐穀瑞因見堤工危險遂推

諉規避將地方之事視爲膜外著交部察議具奏又據欽差大臣常明奏稱寶坻縣最係低窪之地平時易於被水知縣吳槃實心辦事將上年特發帑金新修之堤岸加意保護晝夜巡視是以堤岸完固而地方不受水患甚屬可嘉著將吳槃陞授山西大同府知府常明又稱玉田縣知縣魏德茂專務虛名而諸事怠玩防守工程亦甚廢弛魏德茂著革職

雍正五年十月十六日署直隸總督宜兆熊等題請緩徵被水各屬州縣錢糧奉

上諭朕念直隸近水低窪之處易於被水用沛特恩遣

官發帑加意賑恤此乃格外惠及窮民之意至於被水之處仍應勘明分數題請照例蠲恤不得因已經遣官發帑遂不照定例遵行並諭別省知之

雍正五年十二月二十二日署直隸總督宜兆熊等題報東光縣盜犯戰二忙等越獄奉

上諭據宜兆熊等奏稱東光縣盜犯戰二忙等四人乘夜越獄向來重犯越獄之事甚多既有關於國體且此等凶惡之徒逃出更有害於良民從前大盜孔林魏二等越獄經朕切加申飭將督撫地方官嚴定考成伊等始知儆惕將各犯緝獲今各處越獄之風尙

未止息與其懲治於事後何如防範於事先或因城垣不完或因囹圄不固或因巡邏人少稽察不密必各處有疎忽之處犯人始得乘間潛逃無所忌憚著各省督撫按察司各就所見應如何料理可免重犯疎縱之處令各具本陳奏著九卿斟酌定例施行數年以來朕因盜案屢降諭旨且令畿輔有司嚴行緝捕以靖地方而安良善東光縣亦近在京畿輒敢疎縱若此著將知縣革職此越獄之盜照例勒限緝拏如逾限不獲將總督上司等官一併嚴加議處

雍正五年十一月初八日

上諭前據怡親王大學士朱軾奏稱直隸水田稻穀豐收民間多不慣食稻米請發銀採買米石使得賣米價銀以買小米高粱於百姓甚屬有益此特爲民食計非爲倉儲計也近聞州縣中竟有逼勒小民強買稻米者此等不肖官吏生事擾民將朕愛民德政奉行不善反爲擾民之事較之一切貪劣之員尤爲可惡該督等漫無覺察所司何事此皆庸碌州縣假手不肖賤役書吏任其顛倒之所致著令確查嚴叅治罪倘該督等徇情隱庇不行查叅將該督等一併嚴加議處著將朕旨傳諭通省務令百姓人人知之

雍正五年十一月十一日

諭刑部朕曾降諭旨自雍正五年正月初一日爲始直隸盜案事發仍照舊例不分首從皆斬直隸盜案多由各省匪類聚集上盜著行文各省督撫出示遍行曉諭使皆知所畏懼所頒諭旨甚明今年直隸現有緝獲之案爾部卽訊明該犯若地方官已經曉諭該犯何以愍不畏死尙敢行劫若地方官未經曉諭卽行文該督何以不遵奉諭旨遍行曉諭將緣由查明咨部爾部具題時繕摺夾入本內具奏

雍正五年十一月十九日

上諭前倉場侍郎岳爾岱劉於義奏稱通倉收貯米石甚多若將旗下兵丁在京應領之米派四旗在通倉支領冬月一季而以次年應運京倉之米收入通倉則通倉新陳之米可以更換收貯卽以省出運送京倉之腳價給於兵丁以爲赴通搬運之路費足以敷用於公私皆便等語朕因此奏應行發與辦理旗下事務王大臣及該部倉場議奏據王大臣等會議准行具奏朕以所議尙未妥協目前正值冬季支放甲米之時爲時甚近著仍於京倉支放此事創行之始著再行詳細妥議俟明年舉行將此面諭廷臣乃今

日正黃旗副都統舒楞額奏稱前日奉旨將旗下甲米仍在京倉支領而旗下之人皆歸功於臣之密奏侍衛查魯向臣姪面詢叅領閔成烈等又向臣稱贊此乃關係旨意之事伊等輒敢捏造謠言以無爲有強加於臣大干法紀請將閔成烈等四人與臣一併審究從重治罪等語舒楞額並未陳奏旗下領米之事而外間人等不知何所聞見而造此謠言夫以不在通倉領米感激舒楞額之陳奏則必以在通倉領米怨望岳爾岱等可知矣朕日以正人心端風俗爲訓誠蓋以向來人心不正風俗不端莫甚於懷挾私

意造作流言如朝廷行一便民之政則羣然揣度以爲出於某人之陳奏若遇無耻之人喜獲美譽亦公然自認而不辭又如朝廷擢用一人則私相揣度以爲由於某人之薦舉而平日與其人相親厚者又從而附會之朝廷處分一人則私相揣度以爲由於某人之讒譖而平日與其人具有嫌隙者又從而附會之朝廷賞人之善而衆人不以爲有善之當賞但妄議其得賞之由朝廷罰人之過而衆人不以爲有過之當罰但妄議其受罰之故此倡彼和散布流傳巧猾之徒籍以擅作威福者在其中宵小之輩籍以報復

恩怨者亦在其中而大奸大詐之流籍以擾亂國政
蠱惑人心者亦在其中惡習如此竟使朝廷不能興
革一事賞罰一人而謹慎自守之臣工畏避嫌疑將
至不敢陳奏一語此風豈可長乎我

聖祖仁皇帝臨御六十餘年功德之盛超越千古朕在藩
邸四十餘年何事不曾閱歷而卽位以來夙夜孜孜
勤求治理諸事皆已練習然則

皇考與朕於用人行政之間雖有採訪輿論之時而斟酌
權衡自有一定之見豈但以人言爲可否何以

皇考時此輩宵小妄爲議論相習成風數年以來朕屢加
訓飭至再至三而惡習蔽錮如此之深仍不能悛改
耶從來滿洲風俗最好從不曾爭論財物本朝定鼎
之初兵丁每月給銀一兩並無米石而衆心皆相安
以爲常後蒙

皇考天恩加增至一兩倍之多且數十年來

皇考與朕格外施恩於旗人者不可枚舉今以國恩賞給
之糧石令其在通支領一季而猶恐車價艱難復將
公項銀兩給與本人助其搬運亦可謂體恤之至矣
而乃輒生怨望之心造作全無影響之語似此爭多
較少之惡習希冀無厭之貪心實向來滿洲之所未

見者此等卑污之習皆始自包衣下賤奴才況且領米到手並不存貯以爲饗殮之計往往賤價糶賣轉眼又復啼饑種種弊端人所共知共見朕爲天下主又豈能以國家一定之經費曲市私恩以博無知小人之稱頌乎滿洲漸失舊風總由該管大臣官員等苟且因循不能導化以致日漸澆薄全失當年淳樸節儉之意至於造作流言之風尤可痛恨舒楞額據實叅奏甚屬可嘉著交部議叙朕年來訓誨旗人者至詳且備今尙有頑梗之人敢於造作流言惑人心志斷不可不行根究著莊親王順承郡王馬爾賽馬

蘭泰拉欣查弼納德明將查魯閔承烈等革職拏問會同嚴審務將造作此語之人實在情由究出具奏
雍正五年十一月二十五日營田水利府叅奏御
史王瓚等玩悞玉田縣還鄉河堤工奉

上諭凡堤工事務承修官與地方有司均有責任定例昭然嗣後直隸河道工程著河員與地方官協同承修防護務期保固無虞如限內有衝決之處著落河員與地方官照例賠修倘再敢怠玩推諉著一併革職照南河河員李世彥孫國瑜之例枷號工所仍令賠修以爲忽視工程之戒

晉車述元 卷之五 十一
雍正五年十二月初四日

上諭直省拔貢舊例十二年題請舉行一次後因各省學政不能秉公選取國子監未便照例請行於雍正元年特行一次朕思各州縣每年歲貢較其食廩淺深挨次出貢內多年力衰邁之人欲得人材必須選拔著令各省學臣於科考時照例府學拔取二名州縣學拔取一名寧缺勿濫務取學問優通品行端方才猷可用之人令其來京朕將親行考驗令入國子監肄業如有學問荒陋人品不端才具庸劣者將該學政嚴加議處嗣後六年選拔一次國子監屆期題

請候旨

雍正五年十二月初四日

上諭蔚縣廣昌連界之案朕前令直隸山西督撫詳議具奏何以至今尙未奏聞凡兩省交界州縣歸併之處甚於地方有益如蔚州蔚縣介在直屬保安西寧之間自應俱隸宣化府而蔚縣之廣昌巡檢則宜歸大同府之廣昌縣管轄庶兩省邊界可畫一清楚爲督撫者不得各持私意輾轉因循著速議具奏

畿輔通志卷之五

畿輔通志卷之六

詔諭

皇上諭旨

雍正六年正月十三日

上諭君臣上下之間必至誠相接始不愧堂廉一體之
 誼朕待內外大小臣工推心置腹事事至誠從無一
 毫虛假而為臣者尚忍以偽妄欺詐之意待朕實可
 寒心其罪誠不可逭宜兆熊乃旗下平常無能之人
 因其尚忠厚謹慎荷蒙

聖祖仁皇帝深恩用至福建將軍伊在任亦並無出力報

効之處及朕卽位以來伊亦不過平常供職前因直隸總督員缺一時不得其人故令伊署理印務昇以畿輔節制之重任教導訓誨至再至三勉其不及宥其過愆然則朕之恩尚可負乎劉師恕向來過失多端近年屢經敗露朕見其人尙謹慎小心且年力精壯深有悔過遷善之念是以降旨寬宥格外加恩令其協辦直隸總督事務以觀其後效然則朕之恩尙可負乎張适係年羹堯案內獲罪之人中外所知且又有虧欠錢糧各案法難寬貸朕念伊祖張玉書在

聖祖仁皇帝時効力多年而伊之過犯大約由於年羹堯

之挾制不能自主於是赦其過愆復其官爵諄切訓諭冀其成人伊亦感激愧悔奏稱情願竭力報効朕是以用爲直隸布政使然則朕之恩尙可負乎魏定國由知州擢用知府朕初見時伊假作醇謹之狀朕謂其爲人誠實可用又經傅敏法海極力保薦是以用爲直隸按察使伊上年來京陛見朕察其心術知爲沽名邀譽之流並非誠實無僞者曾屢向在廷大臣言之魏定國由微末之員於數年之內擢至大僚且因伊服官効力朕推恩及於其父逾格優待然則朕之恩尙可負乎曾逢聖實係市井光棍由鑽營而

至知府甚屬狡詐前者被叅虧空之時朕料其歷任畿輔多年自尙有作弊貪贓之款項令該督藩臬等曉諭該地方若果有被屈受害之人准其據實控告審理以懲貪墨昨聞有老秀才呈告曾逢聖當日居官劣欵而張适將此秀才嚴刑夾訊旋即斃命謊稱在監病故且坐此人以平素積惡之名不思辯冤旣奉諭旨誣告自有國法卽此秀才果有應得之罪亦當審實奏聞按律置之於法方足以服衆人之心豈有訟獄未定曾逢聖之案未結而將首告之人遽以三木畢其性命之理此不過有意袒護曾逢聖惟恐

控告者多故先殺一人以箝衆人之口似此慘酷之行世所罕見宜兆熊劉師恕身爲總督若罔聞知負朕任用之恩甘蹈狗隱之咎尙得謂之事君以誠無欺無隱者乎魏定國專司一省刑名乃一任張适之恣意妄行全不置問及朕面加詰責則將顛倒是非草菅人命之數案全推於張适而置己身於事外似此姦險巧詐之存心朕深惡之若然則直隸之設立臬司衙門者何爲朕之簡用魏定國者又何取乎觀此則魏定國之居心行事乃沾取虛譽之輩而傅敏法海徇庇袒護科甲妄行保薦其情狀顯然矣諸臣

試自思之朕以至誠待諸臣至於如此而諸臣以欺詐待朕至於如此朕安得不爲之寒心而諸臣清夜自思亦忍爲之乎若不隨其敗露嚴加懲治此風不息張迺魏定國俱著解任著傅敏史貽直前往保定將會逢聖各案及夾斃秀才情由一一秉公嚴審務將實情悉行究出不得絲毫徇隱傅敏旣誤薦魏定國於前倘審理此案稍有疎忽瞻顧之處經朕察出定行重治其罪直隸布政使員缺著將山東按察使楊紹補授直隸按察使員缺著將兩淮鹽運使張燦補授山東布政使岳濬將山東錢糧一一料理清楚

奏聞毫不瞻顧甚屬可嘉朕欲清查山西錢糧著將岳濬調補山西布政使將高成齡解任江蘇布政使張坦麟爲人謹慎辦事亦明白但器局稍覺褊淺聞伊在任與巡撫陳時夏不甚相合此二人皆非懷挾私心彼此矛盾者其中必有一是一非撫藩旣有不協之意若仍令共事於地方無益著將張坦麟調補山東布政使其江蘇布政使員缺著將江蘇糧道趙向奎補授

雍正六年正月二十一日巡察御史楊保等叅奏天津旗兵喧鬧公堂奉

上諭天津新設營兵豈容在地方生事此風斷不可長著內大臣侯陳泰刑部尚書德明前往天津將一千人犯嚴加審訊務將實情究出分別定擬具奏都統公鄂齊來京時亦當委員管束兵丁何以疎縱至此著將鄂齊及該管官員俱交與陳泰德明嚴察議奏

雍正六年正月二十二日

上諭雍正二年朕卽諭李維鈞云聞得直隸滄州地方有偷鑄私錢之匪類應嚴行查拿李維鈞回奏已經嚴查該地方並無私鑄保奏甚力今步軍統領阿齊圖奏稱本月內准內務府咨稱番役因公事前往滄

州拏獲私鑄之回紇劉七等移送前來隨差千總姜進祿帶領番役前往滄州將私鑄之夥黨悉行拏獲並獲鑄錢器皿等語觀此則滄州奸民私鑄之弊由來已久而地方大吏漫無覺察今始敗露阿齊圖差官將匪類夥黨俱卽捕獲不使漏網甚屬可嘉著將阿齊圖及所差官弁交部議敘番役著加賞賚其私鑄一千人犯交刑部嚴審定擬具奏夫私鑄錢文大干法紀且私鑄不息則錢法不能畫一而銷燬制錢等弊皆由此而生何以便民間之用此事大有關係畿輔近地尙有此等奸民則各省遠方難保必無此

弊著通行曉諭再嚴加申飭倘直省督撫中如有似此疎縱不肯實力查拏者朕留心訪察密差京員緝捕若一經察出必將該督撫照溺職例處分

雍正六年三月初三日署直隸總督宜兆熊等題
叅良鄉縣知縣冉裕棐懲責旗人烏雲珠奉

上諭旗民均屬一體地方官審理事務只當論理之曲直分別賞罰不當分別旗民此本內奏稱將旗人遽行杖責亦屬違例等語朕不知向來有旗人不准地方官杖責之例著該部查明具奏知縣冉裕棐係奉行之員本無過失該督將伊叅奏解任甚屬不合著

將本擲還烏雲珠撞轎情由及杖責時曾否自供履歷之處著該督審明具奏

雍正六年三月二十四日

上諭朕不知向來有旗人不准地方官杖責之例故令該部查明奏聞今據該部查奏因思當年定例自有深意且遵行已久自應照舊但例內開載官員擅責旗人者降一級調用昨良鄉縣知縣冉裕棐擅責烏雲珠一案卽按定例亦不至於解任質審而宜兆熊劉師恕將該縣特叅前來並請解任質審甚屬不合宜兆熊劉師恕所叅直隸官員往往過於苛刻似此

類者甚多封疆大臣不爲國家愛護人材輒將可用之員因細故微瑕而致於擯棄豈不可惜著嚴飭行

雍正六年六月二十日

諭向來之例斬絞等犯非常赦所不原者其父母年
至七十家無次丁始將應否留養之處開明罪犯情
由請旨定奪此乃法外之仁也然亦必本犯之罪有
可原其父母之情有可憫然後准其留養從前鶴六
斤之案其父母年未七十而李紱違例兩請法司議
覆時卽照李紱兩請具奏朕以被毆之人係抽風身
死情罪尙輕姑從寬典准其留養並非著爲定例也

今宜兆熊等將柳文保毆死柳滿福之案援引鶴六
斤之案兩請具題該部理應嚴行駁詰按律定擬方
爲平允今德明黃國材等仍照宜兆熊等兩請議覆
伊等之意不過欲自沽寬大之虛名而不顧國家之
憲典殊不知將實在有罪之人枉法縱釋並不受囚
囹之拘禁使死者含冤生者抱痛積孽亦已深矣而
欲以此邀福於冥冥之中有此天理乎且定例父母
七十方行兩請是合例之人尙須酌其情罪之輕重
而後從寬今若又開未及七十留養之例將來各省
效尤凡父母現存之人皆可援以爲請而鬪毆殺傷

音車文
擬抵者無幾矣凶暴之徒必至肆行無忌何以示懲
甚爲人心風俗之患司刑憲者亦曾思及此乎若情
罪可輕該督撫卽當據實陳奏朕自揆情度理開恩
寬宥何得強引留養以開枉法之端此案刑部旣照
宜兆熊等所奏兩請具題朕亦不能定著刑部自行
定議具奏

雍正六年七月初二日 怡親王參奏水利効力

主簿梁文中奉

上諭凡興修河渠田畝等事朕意本欲惠養斯民爲地
方永賴之利然使差徃人員等奉行不善則轉爲閭

閭之擾從前屢降諭旨甚明前直隸工員內有因
營治稻田拔去民間已種豇豆之事因諭令怡親王
確查今據怡親王等查得候選主簿梁文中在薊州
地方營治水田逼迫民人路中惠等將現種豇豆拔
去毀壞是實具摺參奏梁文中不行曉諭於事先乃
將已成之禾稼逼令拋棄違理妄行不遵諭旨顯欲
阻撓政事非無心錯悞可比甚屬可惡該巡察御史
苗壽陶正中何以不行查參梁文中所犯旣實不必
交與該督再審著革去職銜卽於工所枷號示衆候
旨發落其所毀壞豇豆著於梁文中名下照數追出

價值賠還本人並將此通行曉諭在工人員知之

雍正六年七月二十六日內務府總管常明奏銷

廬溝橋蓋造官房銀兩奉

上諭此朕體恤應試舉子之意俾其有旅次居宿之安
而無盤查行李之擾但恐各省舉子未必知有新設
頓宿之處著禮部行文各該督撫通行出示曉諭並
令崇文門每年查稅官員實心奉行嚴飭巡察人役
等毋得借端稽留額外苛索

雍正六年九月初八日

上諭京城添設倉廩收貯米石甚屬緊要前交與工部

會同倉場衙門相度高阜之處興工修葺已逾數月
未經議覆工部是何意見著吏部侍郎普泰署戶部
侍郎常德壽會同工部作速相度地方乘此天氣晴
明路途乾燥採運物料修葺倉廩以便來年收貯米
石

雍正六年十月十四日

諭戶部直隸爲首善之地今歲春麥秋禾俱登豐稔民
人樂業朕心深慰但地方有歷年帶徵之錢糧若令
閭閻之間新舊並納雖逢豐稔之歲而民力未必寬
然有餘因思歷年帶徵之項乃頑戶之所拖欠也明

年額徵之項乃衆民之所輸將也若欲使小民共被恩澤惟有將明年之賦預行蠲免則比戶可以均霑查直隸額徵地丁等項二百四十三萬餘兩本地支銷俸工及兵餉驛站等項應給銀二百零二萬兩其應起運者計四十一萬七千八百九十兩著將雍正七年額徵錢糧內蠲免四十一萬七千八百九十兩爾部可確查分數行文該督通行所屬州縣一體敬謹遵奉以副朕愛養黎元加惠畿輔之至意倘官吏等私自多徵朦混中飽或地棍等包攬侵蝕作弊藏奸又或有司奉行不善使百姓不得均霑實惠經朕

訪聞必重治其罪並將總督司道等嚴加處分

雍正六年十月二十二日諸王大臣等以

景陵寶城瑞芝挺生具摺奏賀并請宣付史館奉

上諭朕以實心實政爲本不言符瑞但今芝草生於

景陵寶城此我

聖祖仁皇帝昭示嘉祥景象朕心不勝感慶准照王大臣等所請宣付史館

雍正六年十一月二十六日

上諭據直隸總督何世璽劉師恕奏稱正定府平山縣知縣徐士俊呈稱本年十一月初八日有山西崞縣

民張其級帶本銀一百五十二兩五錢往獲鹿縣販買布疋路經平邑途間全銀遺失幸平邑農官郭之蘭之子郭見忠拾獲聞張其級失銀遂同本縣生員杜永召等問明銀數悉行歸還不昧毫釐不受酬謝據鄉約鄰佑多人僉稱郭見忠不取遺金衆口如一理合繕摺奏聞旌典出自特恩等語夫見利思義爲人情之所難而秉懿好德實人性之所共朕日以興仁講讓訓導萬方務期薄海內外革薄從忠還醇返樸以成昇平之治乃年來齊民中不拾遺金者有京師之草夫六十一豫省之翟世有陳懷金又有直隸

平山縣之郭見忠可見質實之民性皆良善彼此觀感興起率教從風遂覺崇廉尙義之舉史冊所稱者今則一時屢見雖僉邪匪類盜竊詐僞之風未嘗盡息而良民順則實風俗漸厚之明徵朕心深爲嘉悅郭見忠著與八品頂帶賞銀五十兩以表揚之

雍正六年十二月初十日

上諭近來直隸盜風漸覺少息而所報盜案多在永平朕密訪其故聞得永平之盜風不息者皆地方官之釀成如本年六月初九日前署盧龍縣知縣衛步青衙署被盜將伊幕客誤認縣令綁縛拷逼劫去財物

而該署令止以竊賊具報同夜又有賊入永山協副將署內值副將胡傑寢於外堂知覺防備賊始颺去而該副將亦未報查又聞得十一月初八日山海關有何字號當舖被盜亦係多人白晝強劫而官役兵弁置若罔聞似此則該督提所司者何職而巡察御史所訪察者又何事著該總督提督巡察御史明白回奏

雍正六年十二月二十日

上諭據直隸總督何世璜等奏稱景州鄉民李世奇不取遺金與廉樂善甚屬可嘉著照郭見忠之例給與

八品頂帶賞銀五十兩以示旌獎

雍正六年十二月二十日

上諭倉儲關係天庾最爲緊要從前倉務廢弛弊竇叢生不可枚舉朕不得不嚴加整頓凡所以清查虧空治罪分賠者總欲令嗣後衆人知所做戒也今倉場各官俱已奉法積弊漸清人情咸知警惕矣此項虧折餘米因六十一年監督等未曾出結是以責令六十年之監督分賠但從前虧折歷年已久其爲何年何人之虧空實難確指今大學士九卿等所議據事而未推情其中未免有寬抑之處朕意以爲未當茲

特沛恩膏將此項攤賠米石槩行蠲豁並免其究問內有已經賠補者其急公守法之心甚爲可嘉今虧欠者皆施恩豁免而從前賠補者以急公而未得蒙恩於情理未當著查伊等所賠米價銀兩照數給還並將伊等交部分別議敘以示獎勵夫刑以弼教明罰勅法原期臣工之循理去私裨益政事今因倉務整飭將所議從前數十萬虧折米石悉行豁免諸臣亦可以知朕心矣其共勉之

雍正七年二月十一日

上諭薊州城係新修微有頽壞之處及時修理甚屬易

事若視爲膜外任意遲延日久益隳必致繁費其城垣坍塌之處著該州卽行修補該州知州係新任之員此事尙與伊無干嗣後該州遇有陞轉離任等事將城垣有無頽壞與接任官交代若交代不明卽著落前任官修補將此旨傳諭伊等再傳諭內閣凡直省有新修城垣皆照此例行

雍正七年二月十九日

上諭農事爲國家首務督率貴有專司前有人條奏請於各省設立農官以司勸課或設巡農御史令其巡行郡邑勸勗農人及時力作亦足敦本業而防游惰

等語朕思各省耕作之情形不同未可一例通行現
今畿輔之地營種水田以來收穫甚多行之已有成
效設立巡農御史之事當先行於直隸省每年特差
御史一員於二月田功初起之時巡歷州縣查察農
民之勤惰地畝之修廢以定州縣之考成其有因循
推諉以致荒廢農田者卽行叅處該御史亦勤加勸
課督令耕耘九十月間稼穡納場之後回京覆旨至
明年二月照例另派一員前往其該御史出巡一應
供給車馬俱照現今巡察御史之例按口給發務使
農業興修田功畢舉游手之人咸歸南畝以副朕重

農務本之至意

雍正七年五月初七日

上諭聞近來遵化等州縣採買供應

陵上官兵米石竟有吏胥串通兵丁當差人等折銀代米
私相授受每石或六七錢八九錢不等使吏胥利於
侵剋而不肖兵丁但取現銀入手便於花費及至五
六月之間米貴之時艱於糴買往往困乏該管官亦
並不留心稽察嚴行申飭甚非加恩於供奉

陵寢官兵之至意也嗣後著該督嚴飭州縣官將本色米
石按名支給

三陵總管亦不時稽察有復蹈前轍折銀代米者卽行題
叅將授受之人從重議處

雍正七年六月二十三日

上諭據怡親王奏河西務河堤漫開附近之田禾廬舍
或有被淹傷損之處朕心深爲軫念戶部速派賢能
司官帶帑銀二千兩前往悉心查勘賑濟務令各需
實惠

雍正七年閏七月初三日

上諭訓練營伍之道必技藝精熟方有濟於實用聞直
隸地方營汛中鎗手演習時止放空鎗從未裝入鉛

子打把一次似此則信手高低漫無準則何由純熟
而成必中之技直隸幾處如此則通省可知直隸一
省如此則外省可知嗣後著通行直省督撫提鎮等
轉飭所屬於練習火器之時用鉛子打把演熟準頭
則火器皆成利用於營伍實有裨益

雍正七年閏七月初七日

上諭恭查

陵寢祭祀需用黍稷菓菜是以設立園頭莊頭給與地畝
俾其種植灌溉按時供辦康熙三年

聖祖仁皇帝於

孝陵設立莊頭園頭共給地四百一十晌至康熙三十九年又增給地一百五十三晌據禮臣查奏此二項地畝已足供辦祭品朕伏念

陵寢祀禮關係重大所需時獻品物必承辦之人充實豐裕然後嘉穀珍蔬繁茂鮮潔庶可展孝思而達誠敬今欲加增地畝若干賞給莊頭園頭使之供應饒裕著

三陵總管大臣詳悉查議到日交與該部議奏

雍正七年閏七月二十九日

上諭聞直隸地方有寄莊寄糧之弊往往地寄此處糧

寄他處相隔百餘里或數百餘里之遠卽如宣化府懷安一縣有人地俱在懷安而寄糧於宣化萬全者有人地俱在宣化萬全而寄糧於懷安者更有現在懷安納糧而寄地於順天府之寶坻豐潤三河相隔五百餘里者在徵糧者則鞭長莫及而寄地者則彼此無關脫漏欺隱之弊勢所不免地方有司實難稽察催徵朕之所聞如此著直隸總督詳細確查若果有此等應作何更正改隸之法著該督悉心妥議具奏再直省如有似此寄莊寄糧者著該督撫亦詳查酌量定議具奏

雍正七年八月初九日

上諭向來

三陵俸工米石皆係截留漕米支給自康熙五十年漕米不敷經直撫題請將不敷之米每石給銀一兩令遵化薊州豐潤三州縣採買支放州縣委之吏胥遂至吏胥串通兵役折銀代米私相授受雖經降旨嚴禁恐此弊未能盡除而州縣之運送本色者車腳之費不無賠墊且領銀採買或值米貴之時一時難以購辦官員兵役未免守候時日是折銀採買於官兵均屬未便著總理

三陵事務尙崇廩將

三陵官員太監兵役每年需給俸工米石分晰白米若干稔米若干粟米若干預行造冊咨報戶部戶部行知倉場預行照數截留分貯遵化薊州豐潤三州縣於庚戌年爲始所有俸工米石均以本色給發如此則更無不敷之米

陵寢員役不致守候待支胥吏兵丁可免串通折價之弊而州縣亦無賠墊腳價之累矣該部卽遵諭行

雍正七年八月十一日

上諭近畿各府有八旗莊屯雜處其間有司難於清查

且八旗罷黜之廢員及不能上進之子弟與多事不法之家人往往潛住其中結交游手好閒之輩妄行生事或好勇鬪狠或酗酒賭博或與百姓爭訟告訐展轉不休以致風俗日漸澆凌難以整理雖有理事同知一員亦相隔甚遠不過詞訟到案一爲判斷而已平時則無稽查約束之功也朕意欲於旗員及司官內遴選賢能者八員派往各府有莊屯之地方專辦旗人之事時加教誨申明禁約導其善念革其邪心小則分別懲戒大則據實糾叅其有旗民互相爭訟之事仍聽該管衙門審理此差往之員以一年爲

期更換一次果能實心辦理化導有方一年內所管之處無旗人犯法之案將該員與以議敘倘或怠忽廢弛因循瞻顧或擅作威福多生事端著直隸總督與巡察御史卽行叅奏從重議處其如何分析管理及如何定例之處著該部詳悉妥議具奏

雍正七年八月二十日

上諭直隸宣化府屬挖運一事前經部議改徵折色令各州縣照撥運之數每米一石折銀一兩解交受運州縣支給兵丁旣免挖運之煩又省輓輸之累是以降旨允行但查宣屬屯糧例於九月開徵而兵米例

龍輿述志 卷之六
於季首支領今改徵折色恐百姓輸納不前兵丁支給有待著該管官先於藩庫將應發銀兩預行給領俟各州縣徵完之日解司還項至萬全縣及獨石張家二口地勢稍寒每至春夏之間米價不無增長過徑員役口糧及兵丁季米折銀一兩恐不敷採買之價亦著該管官於每年秋成米賤之時約計需米若干於藩庫領銀預行採買存貯各處倉廩以備支給俟各州縣折徵完日解司還項則百姓既免從前挖運之累而兵米口糧亦無需待不敷之慮矣該部卽遵諭行

雍正七年八月二十三日

上諭京師之大興宛平二縣知縣常以虧空被叅朕體察其故二縣在輦轂之下每有一時速辦之公事不能遲緩者只得那移庫銀以濟用爾支領還項未免遲延時日其上司察知庫帑有虧不得不行叅劾此等虧空實有可原之情朕體恤臣工不忍聽其因辦公而遭罷黜爲之思一備用之道著宛大二縣各領戶部銀一萬兩永遠存貯該縣遇有速辦之公事卽詳明府尹將此銀動支應用俟支領銷算之時仍復歸還原項於每年歲底報部查核如此則辦公有賴

備用有資再有虧空國帑或借名擅動備用之銀者
定行重治其罪

雍正七年九月初七日

上諭數年以來各省民人屢有拾金不取之事朕以人
心風俗漸有歸於醇厚之機深為慰悅皆加賞賜以
示獎勸今據直隸巡察御史鄂昌等奏報文安縣居
民盧尚義之妻梁氏拾金不昧告知伊姑給還本人
及謝以布疋姑婦堅辭不受等語以貧家婦女織蓆
營生乃能講讓興廉一門向善為人情所難之義舉
甚屬可嘉著賞給米十石布疋十疋並令該地方官給

與匾額以旌良淑

雍正七年九月十五日

上諭上年直隸通省收成豐稔惟宣化府屬之宣化懷
來保安三處交界之地廣約四十里長約百里獨愆
雨澤頗覺亢旱今據直隸巡農御史舒喜奏稱京畿
一百四十州縣築場納稼百穀咸登各府州縣之收
成冊報八分九分十分不等老幼悉皆得所共慶有
秋惟宣化府西寧蔚縣三處今年六月閏七月間有
冰雹之傷禾稼稍損等語朕思天人感應之理纖毫
不爽連年以來直隸通省雨澤應時西成豐稔而宣

化府屬之數州縣地方兩年之內有亢旱冰雹之災此必地方官民政治有缺風俗不淳是以

上天顯示儆戒欲其警醒悔悟翻然悛改於將來也卽此益見

上天仁愛之心官斯土者宜如何之敬謹修省以免過愆著遍行曉諭勸導令所屬百姓消亢戾澆漓之風敦和睦忠厚之行共爲良善以迓

天庥而此數州縣之紳衿士庶尤當深感

上天垂象示儆之恩各捫心自問若有幾微匪僻乖戾之念卽猛加省改並交相勸勉俾比閭族黨興仁講義

共成親遜良善之俗則以和名和雨暘時若之應

天必錫之以福矣

雍正七年九月二十一日工部摺奏查勘直隸山東江南三省道路事宜奉

上諭爾部卽行文三省動正項錢糧乘此農隙之時派委賢員作速興工務於明春雨水前告竣朕仍遣員往查其修過橋梁道路等項著照爾等所請交與各該地方官隨時修整並令新舊交代永著爲例
雍正七年十月十四日

上諭據署總督唐執玉奏稱磁州民人楊進朝在路拾

銀四十兩錢三千文卽告知地保仍至原處尋覓本人如數交還絲毫不昧等語數年以來各省民人拾金不取者甚多今磁州楊進朝聞風興起克敦義讓甚屬可嘉著該部察例加恩以示旌獎

雍正七年十一月二十九日

上諭各省兵丁於糧糈之外給以季餉所以撫養士卒令得仰事俯育以爲地方捍衛所關甚重而棚銀一項於俸餉內扣留貯庫爲各營買補馬疋之用亦國家恤兵至意也近聞直隸布政司衙門奸吏於請領棚銀時每疋扣陋規二兩至二兩五錢不等直隸如

是他省大約皆然夫倒馬立有限年報銷復有成額豈容奸胥舞弊侵扣嗣後著各督撫及布政司查照定例按期給發如有奸吏增減剋扣遲延等弊各該督撫卽行拏究按律重處倘各督撫失於覺察布政司不能釐剔弊端朕一有訪聞定將該督撫等一併嚴加議處至兵丁歲底預備春餉及支放季餉乃終歲衣食所資亦聞有不肖餉書於放餉則需索季規於借餉則科歛借費此種奸弊深可痛恨著各該督撫一併嚴查禁革務須按季給發不得遲延著該部通行直省督撫布政使司將朕諭旨刊刻曉諭俾官

吏兵弁等咸知之

雍正七年十二月初二日

上諭朕之本意原欲於

孝陵

景陵之旁卜擇將來吉地而堪輿之人俱以爲無可營建之處後經選擇九鳳朝陽山吉壤具奏朕意此地近依

孝陵

景陵與朕初意相合及精選堪輿之臣工再加相度以爲規模雖大而形局未全穴中之土又帶砂石實不可

用今據怡親王總督高其倬等奏稱相度得易州境內泰寧山天平峪萬年吉地實乾坤聚秀之區爲陰陽和會之所龍穴砂水無美不收形勢理氣諸吉咸備等語朕覽所奏其言山脉水法條理分明洵爲上吉之壤但於

孝陵

景陵相去數百里朕心不忍且與古帝王規制典禮有無未合之處著大學士九卿詳悉會議具奏

雍正七年十二月十七日

上諭天津水師營兵丁錢糧前經部議每月定爲一兩

五錢朕近聞得兵丁用度稍有不敷已降旨加爲每月二兩浙江乍浦水師營兵丁亦應一體加恩其新拔之兵丁等每月支銀一兩五錢者著照天津之例加爲二兩於雍正八年正月爲始著該部行文浙江總督等遵諭施行

畿輔通志卷之六

